



TAPAK 10

Nisung tepsetba atema Philippines
Tir anema ken o benok



TAPAK 7

Akshay Kumar-i award sentongtem nung
Stuntmen tem nem kasa tetushi agütsütsü ashi

VOL. XIV NO. 186 (ADOK 186)

DIMAPUR

WEDNESDAY

APRIL 26, 2017

5.00

KCCI-i digital database lapoker

Kohima, April 25 (TYO): Kohima Chamber of Commerce and Industries (KCCI)-i Kohima nung Trading Community atema digital database ta lapokogo aser iba ya state nung mezüngbuba asütsü.

KCCITower, President Jabou Sekhose-i osangbener den jembidang, "digital database ji KCCI atema kanga nungdaker kechiyong register süa aliba züngsemtem atema database tajung mali" ta ashi.

Iba digital database ya KCCI atema dang masü saka state sorkar atemaa tajangzük asütsü kechiyong iba ajanga statistical data aser Kohima Smart City ka asoshi digitalizing nung teyari angüsü, ta Sekhose-isa ashi.

KCCI-i lapokba digital database nung microchip

enoksema lir aser iba nung shishilembar indang temetetsü keta lir, ta paisa shisem.

Iba digital database lapokba indang tongtipang inyakyim kaji KCCI kübok shishilembar shia nem smart card ka ka agütsütsü. Smart card nungji Unique Identification Number (UIN) ka lir aser ibaji registered trader indang account den sendaktepa lir aser identity card ama amshitetsü, ta KCCI President-isa metetdaksü.

Paisa ashiba agi, KCCI nung registered traders 3200 aliba nungi traders 1300 nem smart card agütsütsü atema kulikaketem jangjaogo.

KCCI züngsemtemi smart card atema sen 300 agütsür register asütsü atema Jabou Sekhose-isa ashi.

Kohima nung EduFest agir

Kohima, April 25 (TYO): Lynchpin-i YouthNet den yaritepa anogo ananü atema Edufest ka The Heritage, Kohima nung tenzükogo.

Edufest ya education fair ka lir aser iba nung kaketshirtemi linük nung aser bendanglen aliba college aser university tajungtem nungi züngsemtem den ajurutepa sensaksemtemtsü.

Iba sentong ajanga kaketshirtemi tangalen aliba rejutem nung course balala indang osang tejangja metetetsü maongka agütsür. Tang agiba sentongji class 10, 10+2 aser Bachelors dak tenük yoka agir.

Edufest nung India kübok tesem balala nungi shisaliok reju 18 nungi teshimtet nübotem arua

shilem agir. Iba sentong nung kaketshirtem aser tsüraburtemi institutes aser universities dang fees & scholarships, courses & mark requirements, placements & Career opportunities amala asüngdangtemtsü.

Edufest nung angati shilem agitsü akok aser asüng anüngdang tashi free career guide alitsü.

Tanü Edufest lapoktsüdang Kohima Deputy Commissioner, Rajesh Soundararajan-i, "meranga inyakbaji yimya tajung ka lir. School azüngba mapang nisung ka taküm nung terata agi sünga alir, ajisüaka kaketshirtemi sentong atongtsüla aser itemji mapa küma inyaksü asoshi merangtsüla" ta ayongzük.

Centre-i Tribal Laws anema menokdaker saka UCC aginür: Minister PP Chaudhary

Agartala, April 25 (Agencies): Modi-i aniba sorkari lisopur sobaliba ozüngtem anema menokdaker saka ano Uniform Civil Code (UCC) ka aginür, ta Union Minister P.P. Chaudhary-i ashi.

BJP (Bharatiya Janata Party)-i aniba sorkari UCC pusemer saka onoki tribal tem indang 'customary laws' anema menokdaker, ta Mongulbarnü Agartala nung Minister of State for IT and Law and Justice, P.P. Chaudhary-i metetdaksü.

"Parliamentary Standing Committee kati tribal customary laws indang report ka agütsüogo, saka Centre sorkari iba report atema telemtetba kecha magi lir" ta paisa osangbener dang ashi.

Union Minister-isa ashiba agi, Centre-i Triple Talaq dak sendakba onüktem lemtetsü atema mapa inyaker aser Nagaland, Meghalaya, Mizoram

o Arunachal Pradesh state tem nung 'customary laws' kanga bulua amshir.

North east state tem nung lisopurtem aser local autonomous body temi tensa ajurudang local customary laws ajanga onüktem angatetteper. Lisopur indang customary laws ajanga village aser district council teloktemi telok mesüra kijatem tsüngda ken o tem benoka angadanger.

Village aser district council teloktemi lemtetba onüktem dak sendakba ken o tem atema High Court aser Supreme Court-i dang angadangtsü tashi lir.

Nagaland nung taoba Chief Minister T.R. Zeliang-i aniba state sorkari tetsür nem shilem 33 lemozükja urban civic bodies indang elections agitsü sangdongba sülen taküm February ita tensa mejungi aküm. (Maneni tapak 11 nung...)

Nagaland nung malaria agi shirangba ajema akümer



April 25, 2017 nü Kohima nung World Malaria Day amungdang Dr Kevichusa Medikhru, Dr Neisakho Kera aser tangartem angur.

Kohima, April 25 (TYO): Nagaland nung malaria agi shirangba tatalokba kanga ajema kümogo aser 2016 nungbo malaria agi shiranga asüba ka danga maliasü.

Tang Nagaland nung malaria agi shiranger 828 lir aser iba osang ya 2009 küm Mokokchung district kübok Mangkonglemba nung malaria kanga bulua adokdang, nisung 20 taküm samaba sülen bushiba lir, ta Joint Director & State Programme Officer NVBDCP, Dr Kevichusa Medikhru-i osangbener dang ashi.

Mongulbarnü Directorate of Health and Family Welfare nung World Malaria Day (WMD) sentong amungdang Dr Kevichusa-i iba osang metetdaksü. Taküm omenji 'End malaria for good' liasü.

Nagaland ya category 2 (pre-

elimination phase) kübok adener aser iba nung Annual Parasite Incidence (API) ji nisung 1000 nungi ka dak atongba lir.

2014 küm Longleng nung prevalent rate 3.67 liasü saka tang ibaji 1.14 ajema kümogo aser Mokokchung nunga 2.84 aliba nungi 1.06 ajemogo, ta paisa ashi.

Department-i Longleng aser Wokha district tem nung temulung agütsür kechiyong küm ishika district ana nung malaria samatsütsü atema mapa kanga bulua meinyak. Department-isa international arrtsü aliba Mon, Tuensang, Kiphire aser Phek district tem atema kanga süoki ia bilemer, ta Dr Kevichusa-isa shisem.

India sorkar nungi senotsü aruba ajanga department-i 2016 küm Long-lasting Insecticidal Nets (LLINs) lakh 9 ser meyrjang 14 lemogo. Ajisüaka,

nisung aikati iba net mamshiba atema sasa bilemer. LLIN nung mozü enoka alibaji küm pungu atema dang lir anungji nisung ajaki malaria nungi jenbua alitsü atema iba net amshitsüla, ta paisa mepishia metetdaksü.

Ano nisungtemi Indoor Residual Spraying (IRS) - Dichlorodiphenyltrichloroethane (DDT) mamshiba atema Dr Kevichusa-i sasa bilemba metetdaksü.

Osangbener senden nung Deputy Director, Dr Neisakho Kera-ia o jembidang, "kobi melii government aser private health sectors ajak nung malaria ya 'notifiable disease' ta sangdongtsü aser iba sülen private health sectors-i malaria putetba ajak bangdak department nem osang agütsütsüsa akümtsü," ta ashi.

(Maneni tapak 11 nung...)

Nagaland aser Tripura Anghtemi Ruzazho yimtsüng semdang



April 25, 2017 nü Ruzazo nung Nagaland Angh, P.B Acharya aser Tripura Angh, Tathagata Roy nati Subash Chandra Bose indang nungshilung ka sayatsüba angur. (DPRO Phek)

Dimapur, April 25 (TYO): Nagaland Angh, P.B Acharya-i Ruzazho yimtsüng nung Subash Chandra Bose indang nungshilung ka sayatsüogo.

Kohima rara aser iba ajanga India nüjiso atema inyakba mapa nung teyari agütsüba indang anogo ananü shisatokden sentong tenzükba mapang P.B Acharya-i nungshilung sayatsü.

Tanü Nagaland Angh aser Tripura Angh, Tathagata Roy nati April 1944 nung Netaji Subash

Chandra Bose-i anogo 9 nü atema amungba ki semdang.

India ya 'secular democratic' linük ka lir aser second class citizens shinga mali. India nung senso ajak kasa dang, ta Angh Acharya-i o jembidang ashi.

Paisa, Sardar Vallabhai Patel aser Netaji Subash Chandra Bose nungeri nüjiso atema inyakba mapa nung shilem tulu agiba indang jembii.

India Prime Minister, Narendra Modi-i India renloktsü

süra, north east renloktsüla ta jembiba onük nung ajemdaker Acharya-isa ashiba agi, "India ya lanur linük ka lir aser linük nütsüng yongsük nung shilem 68 ji lanurtem lir. Ibaji asen linük atema rongsen lir, anungji state adena orr tangalen mapa inyakba Naga lanurtemi meyipa arur, state renlokba nung shilem agitsü ayongzük."

Angh-isa Naga Yimten tebilemstü atema tatembang telemtetba ka agitsü atema Naga Yimten telok balala nung züngsemtem ajak sabang ka kübok külemi longjemtsü mepishia metetdaksü.

Ruzazho Village Council Chairman-i yimdaklirtem ajak tenüng nung Nagaland Angh nem memorandum ka agütsü. Iba nung Ruzazho ya National Heritage village ka akümstü atema shia lir aser Angh-i iba onük atema mapa inyaksü ta nangzük.

Ruzazho yimtsüng ya Indian National Army (INA)-i keding asüba mezüngbuba yimtsüng ta züngshir.

Mokokchung nung website ka lapok



Mokokchung Press Club tezülur, Wb. Sashimeren Jamir-i www.emokokchung.com website ka tenzüksür külen website lapoksang Sp. Rongsenwati aser par külem medemertem külemi tangokba noksa nung angur. Mkg, 25th April, 2017

Mkg. April 25 (TYO): ocet (articles)-tem, sangro, e-book-tem, aser zülü tapu balala website ka lapokogo. Iba website-ji Mokokchung Press Club (MPC) tongti zulur & senior reporter, Wb. Sashimeren Jamir ajanga tenzüksü.

Iba website nung ya tongtibangsa Mokokchung town indang osang (information) tapu balala agütsü atema tenzükba lir.

Yangi Mokokchung town kübok ward-tem, riju balala, mozükitem, hotel & lodge, raliwalirtemi semdangba tesem (tourist spot), office balala, shishilembaba tesemtem aser osang balala aika angütsü, ta website lapoksang Longsa nung entrepreneur, Sp. Rongsenwati metetdaksü.

Jangratemtsükaji; iba site nung ya tezülur balalai züluba

Complex nung alidang, Sashimeren-i ashiba agi, taoba mapang Mokokchung nung website kar tenzükogo, aji saka, junga anepalu mesüteti samaba lir, anungji, iba website yabo maneni tajungba-tajungba küma bener aoba site ka südaksütsü asoshi ajungshia liasü.

Iba yagi telok aika nem tajangzük agütsütsü imlar. Tongtibangsa bendanglen alir liso nisungtem asoshi iba website ya kanga tongtibang asütsü, kechiyong asen limai rongsen jenti indoka maruaka iba site ajanga Mokokchung indang temettem karbo ngutetsü, ta Sashi Jamirisa ashi.

Rongsenwati isa Mokokchung Municipal Council Shopping Complex Room No. 95 nungto 20-20 (the complete resolution) ta sür dokan ka lapoka lir. Iba dokan-ji emokokchung indang office asütsü aser yangji akhi noksa tejentem tasen küma yanglutsür, internet browse sütsü, game asayatetsü, Audio/Video, photo nungertem edit sütsü, certificate framing yanglutsür, computer & network services/solution aser tanga mapatem aika inyaker.

Iba website ya mezüng tenzüker asünung, advertisements aginürtem nem jenjang dalangyong agütsütsü. Anungji, tejangrar kar danga lira 8014232645/8732850299/9615833813 nung tongtepratepsü akok.

Tanga party tem dena tesendaktep tajung ayutsüla: Azo



Kuzholuzo (Azo) Nienu

Sekruzu (Phek), April 25 (TYO): Tanü State Planning Board (SPB) deputy chairman, Kuzholuzo (Azo) Nienu-i, kechi tensa ajurudir ajuruaka party züngsemtemi party nungi

masetshitsüla, iba den külemi tanga party tem dena tesendaktep tajung ayutsüla, ta metetdaksü.

Phek district kübok Sekruzu nung 19th Phek A/C NPF senden nung jembidang Nienu-i, "Asenoki BJP party-a manemtsüla aser BJP den tesendaktep tajung ayutsüla, kechiyong Ato kilonser, Narendra Modi lenisüba kübok BJP ya tashitait party ka kümogo," ta ashi.

Nienu-isa, takok anguba ya jangratemtsüka lir, ajisüaka takok anguba nungjia lendong alitsü akok, kechiyong iba ya ajanga asüküm adokdaksür aser

ibaji ajanga tamakok angur, aser khenkhenbo tamakok angubaji tajungba, kechiyong tamakok ajanga ajemaludaksür aser asüküm dang nungibo ajemalu ajanga nüburtem kokteter, aser tatemsa ajemaluba jagi takok lenmangi anir, ta ashi.

NPF central working president Huska Yepthomi, NPF central vice president Zaku Tsukru na den Central lenirtemi tang Phek district assembly constituency tem semdanga jajadar aser tanü senden nung parnokia jembia liasü.

Iba senden ya 19th Phek A/C NPF president Api Vadeo leniba nung agia liasü.



Naga people's movement for human rights (NPMHR) tenzüker mezümpur aser Asia Indigenous Peoples Pact (AIPP) mezüng Secretary General, Wb. Luithui Luigam aser AIPP (Chiangmai), Secretary General Wb. Gam A Shimray nati anir telok kati Mokokchung semdanga lisapur aser Naga yimden tebilemstü onük dak sentakba nung ashijunglem senden ka April 25, 2017 nü yangi hotel Metsüben nung akadang tangokba noksa angur. Iba senden nung Mokokchung nung alir senso taintem, Arogo tenzüker, Nagaland University nungi tesayur, osangzülur aser tejangrartem adenshia tongtibangsa Naga yimden onük dak sentakba nung shisa balala lemsatepa liasü. (Mokokchung, April 25, 2017)

Kiyanilie-i Oken Jeet indang kaket sayatsütsü

Dimapur, April 25 (TYO): Social Welfare & Parliamentary Affairs Minister, Kiyanilie Peseyie-i Oken Jeet Sandham-i züluba kaket, 'Modi walking on Elusive Naga peace' sayatsütsü, aser iba sentongji April 28, 2017 anüngdang 11:30 ano nungi tenzüka Hotel Japfu, Kohima

nung agitsü.

Iba sentongji Journalist aser kaketzülur, Rita Krocha leniba nung agitsü.

Sentong nungsa kaket zülusang, Oken Jeet Sandham-ia o jembitsü aser Senior Journalist, Kito Achumi-i tepela anküp o jembitsü.

Horti Dept Jubilee amungtsü

Dimapur, April 25 (TYO): Horticulture Department küm 25 ajungba Silver Jubilee April 27, 2017 nikongdang 1:00 ako nung Capital Convention Centre, Kohima

nung agitsü, aser iba sentong nung tongti tesemdanggerji Nagaland Angh, P.B Acharya asütsü, ta tanü ketdangser sangdong ka ajanga metetdaksü.

Tohoi Village Tobacco Free kümogo

Dimapur, April 25 (TYO): Niuland Sub-division kübok Tohoi village ya Dimapur district nung Tobacco free yim tanabuba kümogo, aser ibaji Village Council, Arogo, GBs aser tesayurtem tawa senden amandang lemteta liasü.

Iba nükjidong ya yim nung anema-alibaren jenjang ajungkettsü aser lanurtem moko nungi küzmüksü atema lir.

Yim telongtet nung moko chiyungtsütem ayokertem dang village council-i senchi tulu achitsü, ta osang ka ajanga metetdaksü.

Iba dak sentakba nung Dr. C Tetseo-i, tatishitsü tajung sayuba atema Tohoi village nem tenüngsang agütsüba den külemi tanga yimtsüngtem danga moko nokdangtsü atema ajungshia liasü.

CTN jila nung ki ka rongdok



Changtongya town (Mokokchung), April 25 (TYO): April 24, 2017 ayaterm 11:40 ako meta Changtongya Town, Longpangtsung Ward nung National Highway-2 den atongtepa aliba, anaben amentepa asüba semi-pucca ka meshimeshia rongdokogo, ta ketdangser osang ka ajanga tanü metetdaksü.

Iba ki ya Akhoya nung Wb. S.T Yanger'er ki liasü, aser iba kitsük-kirong ajanga sen crore ka shi takoksa nguogo.

Tuli jila nungi fire brigade van atuba aser jila sensotem

teyaritep ajanga kibur telidak R.C.C building bo tera dang rongdokba den külemi anasa aliba kitembo mi lendong nungi küzmük, ta ketdangser osang nungsa metetdaksü.

Kiburi ashiba agi, miji electric short circuit ajanga adoka liasü.

April 25, 2017 anepdang 6:00 ako meta S.D.O (C) Chumbamo Humtsoe den Dobashi-i iba tesem semdangogo aser takoksa angur kibong ajuruua parnok dang akokba tashi teyari ajak agütsütsü ta shiogo.

36 Assam Rifles-i yi aika apu

Dimapur, April 25 (TYO): Headquarters IGAR (N) kübok 36 Assam Rifles sepaitemi osang tejangja ka lazükba sülen parnok den police densema April 23, 2017 nü Nihoi, Jalukie, Peren District tesem nung Mobile Vehicle Check Post (MVCP) nung gari mita repringdang Maruti Alto 800, Regd No NL 07H 3006 gari ka sota iba gari nungjagi sen 15,000 jenjang IMFL yi pongdang 169 puogo, ta Lt Col Amitabh Sharma PRO, HQ

IGAR (N)-i sangdong ka ajanga metetdaksü.

Iba ken o dak sentakba nung nisung ana- 3rd Mile, Dimapur nung alir arishi küm 33, Huto Zhimo aser Naga United Village, Dimapur nung alir arishi küm 30, Kevi Chakesang na puogo, ta paisa sangdong nung shia lir.

Maneni bushisüngdangtsü atema tena den tena ket nungi apuba yiji Jalukie Police Station ket nung agütsüogo, ta Assam Rifles sangdong nungsa metetdaksü.



Imphal, April 25: Mongolbarnü Imphal, Maharaja Chandrakirti Auditorium nung Manipur Bharatiya Janata Party pur Anogo ana State Executive senden akaba tatembang buba sentong nung Manipur Chief Minister Nongthombam Biren Singh, BJP NE States Zonal Org. Secy. Ajay Jamwal, BJP Manipur Pradesh President KSH Bhabanda, Prahlad Singh Patel M P and In charge Manipur BJP, Manipur Commerce & Industry Minister Thongam Biswajit Singh aser BJP MLA tem tangokba noksa nung angur.

Assam nung lokti 6 nem ST jenjang agütsütsü asoshi lemtep

Guwahati, April 25 (Agencies): Hombarnü New Delhi, North block nung Centre, state aser lokti 6 nungi lenirtem senden nung Centre-i item lokti nem ST jenjang agütsütsü asoshi parnoki molungteter aliba lemsatepaka, Assam nungi lokti 6-i parnok nem ST jenjang agütsütsüba maparen monuba atema mepelaba lemsatepa liasü.

Union minister of state, home affairs Kiren Rijiju-i ashiba agi, item lokti nem ST jenjang agütsütsü asoshi Centre sorkari jenjang shidak agi odar. "Centre-i Assam nung OBC lokti 6 nem ST jenjang agütsütsü asoshi melungteter lir. Center sorkari iba ken o asadangtsü asoshi committee ka shimogo. Onoki iba dak sendakba nung maparen balala inyakdar," ta Rijiju-i ashi.

Osang ka ajanga ashiba Centre, Assam sorkar, lokti 6, Adivasi National Convention (ANC) aser All-Koch Rajbongshi Students' Union-P

(Akrus-P) pur tsüingda senden kanga süngjema agiogo. Iba senden nung Rijiju aser Assam minister for commerce and industry Chandra Mohan Patowary nati lokti 6 nungi teshimtet züngsemtem den ajurutepa sensaksema liasü. ST jenjang meshiba lokti 6 temji; Koch Rajbongshis, Morans, Motoks, Tai Ahoms, Chutias aser Adivasis (Tea Tribes) lir.

ANC puri Assam nung Adivasi lokti atema ST jenjang meshiba den külemi 2012 küm telungpur temai adokertem dak sendakba nung parnok atema talidak tesem aser tanga tenüngdakbatem agütsütsü asoshi khanga arudar. Akrus-P puria parnok sobaliba, oshi aser yimden yimsüsübaren nung parnok temeden kümzüka ayutsü asoshi Koch Rajbongshis lokti atema ST jenjang kanga arudar.

ST jenjang agütsütsü asoshi asadangba committee ajanga parnok ST jenjang

anguba sülen maparen balala nung menden wazüka toktsütsüba amala maparentem asadangdar. Item lokti 6-i Centre dang parnok nem ST jenjang agütsütsüba nung parnok ajangzüksü asoshi tasa balala asaa monura parnoki longkak aitba sentong ayongtsü ta amokmeren. Committee ajanga June 30 nü parnok osang agütsütsü.

"Centre-i report agütsütsü menura onoki ajemajema malitsü. Centre nung sorkar kümtetba sülena sorkari onok nem ST jenjang agütsütsü sür joko ita aika süiogo," ta Akrus faction tir Hiteswar Barman-i ashi.

Kasa mapang nung Mongolbarnü New Delhi nung kuli kaket tejangja makai Assam nung bendanglen nungi arua alirtem dak sendakba nung sensaksema ajanga jenjang tajungba ka lapoktsü ta ASSU-i temolung lema bilemer. Iba senden Union home minister Rajnath Singh lenisüba kübok agia liasü.

Guwahati nung Rajdhani Express nungi hon ngutet

Guwahati, April 25 (Agencies): Hombarnü Government Railway Police (GPR) ajanga hon seret 3 ngutet. Item hon ya Delhi nungi aruba Rajdhani Express nung Guwahati railway station nung ngutet. Iba maparen nung police temi nisung ka pua lir.

"Mita bushiba mapang hon 'bar' 13 aser anu hon tila ka ngutet. Hon ya Myanmar nungi shibelenba lir aser West Bengal nung miima hon shishilembaba tesemi bener aorba liasü," ta police osang ka nung ashi.

April ita kisüng nunga GRP temi hon seret 30-shi aser iba ken o dak sendakba nung nisung ishika pua lir.

Taoba Hokulbarnü police temi nisung asem pua lir aser parnok ket nungi hon seret 15 nguteta lir.

"GRP temi oset shibelenba nungi nokdangtsü asoshi telok ka denteta lir aser parnoki ita ka tsüingta nung sen crore 9 jenjang

hon nguteta lir. Aji saka nisung peria maliba ajanga iba maparen junga meinyakteter," ta police ketdangser kati ashi.

Taoba küm ishika tsüingda nung hon shibelenba maparen timba kümogo. Siliguri aser West Bengal nung item hon miima shishilembatsü tesem lir, ta police temi ashir. "Demonetization sülen hon shibelenba ayokba maparen tajemba kümer liasü, saka iba maparen anu tenzükshio. Bushisüingdang telok kati ashiba agi, Guwahati nung taoba küm ana tsüingda nung sen crore 2,000 jenjang hon shibelenba yokogo," ta osang ajanga ashi.

Bendanglen nungi hon ya Myanmar arrtsü ajanga Manipur aser Mizoram nung aliba Zokhawthar tesem ajanga shibelenba.

Hombarnü GRP temi mita bushiba mapang railway station nungi Ganja seret 14 ngutet aser iba ken o nung nisung asem pua lir.

Assam nung Shiti kati sen 40,000 achi

Guwahati, April 25 (Agencies): Northern Assam kübok Sonitpur district nung shiti tulu kati dokan ka nungi sen 40,000 achi.

Iba tatalokba ya northern Assam district kübok Tarajuli süngo lu nung atalok. Deobar aonung arem shiti ka adoka Rajendra Dugar'er dokan raksaja idakji yua aliba sen 40,000 chitsü.

Dokan kiburi-i ashiba agi, pai

sen dokan nung dang ayur.

Osang ajanga ashiba agi, sen 26,000, 100 note nung aser sen 14,000, 10 note nung ta liasü.

Sen achiba sülen mapang tatsüka lir külen shiti-i sen note 10 nung aliba taleppi saksüta toktsü.

Sonitpur district nung forest ketdangsertemi ashiba agi, arem nung süngdonglitong atsüingba ajanga arem shititem iba tesemi adoker.

PELABA SANGDONGER

24th April 17 aonung ozü kitsük kirong lendong nung shirisa nübu, rongsen aser shisatsü agi yaritepogo, nenok ajak dang pelaba metetdaksür. Talisa item telok dang alia pelaba shisemer: -

1. Akhoya Kosasanger Putu menden aser Changtongya Kosasanger Putu menden.
2. Changtongya town administration aser fire brigade Tuli.
3. Changtongya Sub-division nung aliba Govt. Department ajak.
4. Changtongya Town council.
5. Changtongya Town G.B Council.
6. Changtongya Town Baptist Arogo-i anir temeket Arogotem.
7. R.C. Chiten Jamir Memorial High School-i anir temeket aliba school, Staff aser student ajak.
8. Temeket yimtsüngtem nungi.
9. Changtongya town Business Union.
10. Ano tanga lokti tentet balalatem.

Ozüi nenok dangi tsüngdong maruteter, saka iba sangdong ajanga nenok kija, kibong aser lokti ajak Tulusang Tsüngremi moajang ta sarasademer.

- S.T. Yanger Kibong aser Kinüngertem.

CHRISTIAN HIGHER SECONDARY SCHOOL
 NYAMO LOTHA ROAD, DIMAPUR - 787112, NAGALAND
 E-mail: christian.dimapur@gmail.com / chss_dimapur@yahoo.co.in
 Website: www.christianhigherschoolsdimapur.com

ADMISSION FOR CLASS 11 ARTS & COMMERCE 2016 - 17

We design your child's future  *We build your child's career*
IN LOVE AND TRUTH WE STRIVE

ADMISSION FORMS & PROSPECTUS FOR CLASS 11 (ARTS & COMMERCE) 2017-18 FOR BOTH BOYS AND GIRLS WILL BE AVAILABLE AT THE SCHOOL OFFICE FROM 9:00AM - 12:00 NOON ON ALL WORKING DAYS

SPECIAL FEATURES

1. Summer Bible School
2. Spiritual Retreat & Counselling
3. Career Guidance Cell
4. Smart Board Classrooms
5. Hostel for Boys
6. Bus Service
7. NCC
8. Scouts & Guides
9. Club Activities




 Office of the Sr. State Medical Commissioner
कर्मचारी राज्य बीमा निगम
EMPLOYEES' STATE INSURANCE CORPORATION
 का एवं कर्मचारी सेवास, भारत सरकार
 Ministry of Labour & Employment, Govt. of India
 क्षेत्रीय कार्यालय REGIONAL OFFICE
 पश्चिम बंगाल PANCHDEEP BHAWAN, पूर्वीय क्षेत्र NORTH EAST REGION,
 गुवाहाटी, पुस्तक-281021 BAMLINMAIDAM : GUWAHATI - 781021
 टि-44/ई-मेल: smc-nor@esic.in
 फ़ोन/फैक्स/पी. नो./फैक्स: 0361-2650705
 ईमेल/वेबसाइट: www.esic.in/ www.esic.nic.in

No. 43-UL/11/2015/SSMC/ (NER)-DAMP Date: 19.04.2017

Expression of Interest (EOI) X-Ray Centre
 Kholiboli ESIS Hospital/Dispensaries N.E., state
 Jhark., etc - Assam, Meghalaya, Nagaland,
 Tripura, Mizoram, Manipur

Expression of Interest (EOI) for Establishing X-Ray
 Centre in ESIS Hospital/Dispensaries of N.E., States
 Le Assam, Meghalaya, Nagaland,
 Tripura, Mizoram, Manipur

Yeti sealed quotation dipolito eligible parties oporti categories kharbara 50 din majori dipi, details karuni morom bara website sapi www.esicner.in/ www.esic.nic.in

Sealed quotation is hereby invited from the eligible parties on the above categories within 50 days. For Details please visit website www.esicner.in/ www.esic.nic.in

Dr. Th Hareshwar Meetei
 Sr. State Medical Commissioner (NER)



TIR YIMYIM YIMOBILEM (EDITORIAL)

DIMAPUR WEDNESDAY, APRIL 26, 2017

Küm züngya melenshitsü !

India nung Narendra Modii aniba NDA government kümer küm asemubaba ayaok tashi nung aritepa linük nung temelenshi aika bener arutsü merangba angur. Item rongnung mezüng Narendra Modii aniba government-i bener aruba temelenshiji linük atema sentong yanglua senotsü lemküksüba telok Planning Commission melena NITI-Aayog shimba mapa liasü. Iba sülen kasa linük aser kasa government süaka küm aika Railway budget o Union budget na balala yanglua inyaka aruba inyakyim melenshia Railway budget-a Union budget den külemi loktepdaktsüogo. Iba sülen ano linük nung tax magütsü ayuba ochimashi sen putettsü atema sen 500 aser 1000 note (denomination) melena sen 2000 note adokogo. Ano, tang Narendra Modii melenshinübaji government küm (Financial year) alemli British nunger mapang nungi amshia aruba April 1 nungi March 31 tashi küm ka ta asükba melena January ka nungi December 31 tashi government küm sünür. Pai iba tebilemba ya tawa state ajak nungi chief minister-tem den senden ka amendang metetdakja liasü. Ibaji dang masü saka ano Narendra Modii melenshinüba mapa kaji linük nung parliamentary aser assembly election ya state ajak nung külemi dang linür. Tangbo Parliamentary election state ajak nung mapang ka nung agiba dak alaka küm shia state balala nung assembly election agir, anungji linük nung 'electoral politics' jemi manener. Iba jaji linük nung terenlok mapa inyaktsü asoshi jembitsü mapang peria mangur. Iba ama shisatsü aser tebilemba tasen bener aruba jaji linük nung temelenshi tajung bener arutsü imlar. Aji oda, tang Narendra Modii melenshinüba rongnung government küm March nung tenzüker April nung atemba yimya ya lir. Atangji, April nungi küm tenzüka yimya ya 1867 küm British nungertemi India lima parnok kübok alidang tenzüka maparen ka lir, kechiyong England nunger küm tasen tenzüka anogoji March 25 liasü saka kodang Julian Calendar nungi Gregorian calendar-i melen, küm tenzüka anogoji March 25 nungi April ka agi melen. Otsü agi ashiba agi, 45 BC nung Rome nunger chuba Julius Caesar-i anü arakzüba takzüa küm ka nung ita ter ana alitsü aser March 1 nungi January 1 tashi azüng. Ano, iba sülenjia linük aika nung Christmas anogoang küm tasen tenzüka anogo ama among aser alima aso 9 buba nunga Europe lima kar nungbo March 25 anogoang küm tasen anogo ama agizüka among. Iba anogoji Christmas anogo atongtsü ita tuku lia tenyar Gabriel-i tasüngtet Mary dang laji alima kümtetdakba Messiah tetsü asütsü ta jungkai adoka metetdaktsüba anogo liasü ta amanga züngshi. Ajisüaka, March nungi tenzüka calendar ajanga azüngba anogotemji kümtem süitema aodang meshitaki züngtetba ajanga 1582 küm Roman Catholic putir Pope Gregory XIII-i tang asenoki amshiba January ka nungi tenzüka calendar ya amshitsü temelaba agütsü. Ajisüaka, England nunga 1752 küm nungiang iba calendar amshia aru. Iba 1752 küm ya tamalen Julian calendar amshia arudang anogo sükpetba shitak küma yanglushitsü atema September 3 nungi 13 tashi mali küma züngdoka liasü. Tetezü, 1752 küm calendar nung september 3 nungi 13 tashiji anogo 11 mali asü. Iba amaji mapang mapang shia küm asükba yimya ya melenshia aru. Atangji, kin shia küm tenzüka otsü aser mapang lir. Aji oda, Naga nunger kin karibo April ita ya-ang küm tenzüka ita ama züngshir. Iba amaji küm tenzüka ya ita anü arakzüba apia latetter. Ano talisa küm tenzüka aser atemba ya nisungtem mapa inyakba den putepa alitsüla. Aji oda, nisungtem ya aluyimer teimba aser aluyimba mapa ya tongtibangba asünungji aluyimba mapa tenzükdang küm tenzüka aser alu mapa atem dang küm atembajisa tajungba asütsü. Ano, goverment küm kodang tenzükdir, küm piyong asoshi senotsü sentong yanglutsü. Anungji, India ama aluyimer teimba aliba lima ka asoshi January nung senotsü sentong yangluba agiang nübortem asoshi teyari angutsüba mapang shitak nung angutsü. Ano, yimkong asoshi calendar tapu ka aser government calendar-bo balaka ta asüba nung aiben nübortem nungdak mataloker. Iba ama temelenshi bener arutsüba mapatem nung yabo Modiba ya kanga junger !

OLEMSABANG

Ao Senso nungi ni jendokba ken-onung kü tebilemdangba onüktem

- P.Chuba Ozüküm, Kohima

(Yashi adok nungi...)

1. Rongmei kin dak sendakba onüktem asoshi kechisa Naga Hoho aser Nagaland sorkar na tsüngda o belentepogo, item ya 2008 küm ni Naga Hoho President masü dang inyakbatem lir. Tesülen kechi osangtemsa belentepogo aji ni kija-i masü saka Naga Hoho lokti telemtetbatem inyakba lir.
2. Kodang ni Ao senden dang ni Naga Hoho nungi anendi ta ashi, parnoki na anentsü kecha menüngdaker ta ashi. Oda Naga Hoho-i sorkar dangi züluba shiti meyipa magi tashi Ao Senden Naga Hoho nungi anena alitsü ta kü dang ashi.
3. Kodang Ao Senden-i kü nem Naga Hoho President nungi anentsü anogo tenet atakzüksü, ni anentsü osang Naga Hoho nem agütsü. Naga Hoho Presidential Council senden ka mena ni anentsü memela. Ni loktiliba koba nung ni President menden nung mena lir, iba lokti temzüngtem agi alena lir asünung item ozüngtem aser telemtettsüba angatsü kü teinyaktsü lir.
4. Ao Senden-i iba ken-o asoshi kü tebilemba aser kü jenjang shidangtsü asoshi kodanga maongka magütsü. Telemtetbatem ajak osang kaket mesüra shiti ajanga dang kü nem metetdaktsü.
5. NTC aser CNTC nung Ao Senden adentsü asoshi Lenla Mung dang jazüka telemtetba agiba ngua aruogo saka Ao Senden Naga Hoho nungi atsüngientsü indang telemtetbabo Dimapur nung CNTC senden ka nung Ao Senden tenüng amer ishikati Ao Senden ketdangpur aser Presidential Executive Council majangi agiogo.
6. Tatsüka asoshi inyaka aliba Ao Senden Acting President aser General Secretary nati senso ka jendoktsüsa telemtetba tulu agiba yabo kanga tebilemdangtsü onük ka lir aser iba ama inyakyim ya tematiba jenjang nung aliba lokti ka inyakyim bangdak anema aibelenba ama bilemer.

Tamalen agüja aliba onüktem ajakji khen asoshi inyaka aliba (Interim) Ao Senden-i ni Ao senso nungi jendokbaji Aor ajaki molungra aser Aor sobaliba agi mela-a aliba inyakyim ka süra, ni iba telemtetba agizüktsü molunga lir. Ajisüaka ni yabo shinür; Ao Senden nem Aor senso ka par yimer-ia memeteti mesüra temelaba magi-e senso nungi jendoktsü tashi, otsüla oboula nunger tensa nungi lireplirepa amshia aruba Aor sobaliba-i mela-a ali asü mali ? Aroka ia bilemdanger Aor senso tajungtemi iba tatalokba atema yimjak nung pei tebilemba melemsatepra, Aor asoshi tentet tasen ka tenteter asütsü aser tarutsü putu asoshi tatalokba balaka asütsü ta bilemer.

Ozü Yimjenkimong sensopur ajunga aser ano talisa Putu Menden-i kü senso jenjang tang tashi wazüka yutsüba dang masü saka iba ama timtem tensa ka ajang dang ni aser ozü kipong metoktsü-i amalitepa teyari agütsüba asoshi tepelaba tulu metetdaktsür. Ano ajak dang tongtipangsa, Aor aser Naga senso kwikati aria bilem tulu sayua aser taremzüker agi amalitep mesamadaktsüi teyari tulu agütsüdagi parnok ajak dangi ozü kibongi pelaba metetdaktsür.

Tsüngremi Naga kin maneni moajangma.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agütsü mepishir

Yi, atakatemba chiyungtsü

- Impur Kaketshir Telongjem.

(Maneni taaba adok nungi...)

8. Yi mojing akokba benjong tuluka Mokochung nung 11th January 1989 nung among. Iba anogo nung nisung 30,000 shi police point nung adenshia takokba tepela benjong tulu Tsüngrem tenüng sanga among. Panüji miima aliba yi ghari load jenti bendena "Tang nungi shibai iba temesepa yi tanaben lepa bener arudir, azüi pei saksü dangi tanaben meyip ama atakatem sang aser pa/la asoshi ibai mim mozü ka ama kümdakjang" ta Tsüngrem dang sarasadem rongdok.
9. Aori iba atakatem agiba sülen Naga lima district ajunga nungi Dry state atema ola tulu adok. 20th June 1989 nü kin shia Executive Secretary tem pei Mungdang nisan amer Assembly kima sentepa sarasadem.
10. 23rd June 1989, 6:00 AM nungi parnok nisung 125-i tasü tonga lumitsü (fast unto death) tenzük. Anogo 4 aonung 3 (ghonda 81) lumir külen June 26, 1989, 3:00 PM nung Liquor Total Prohibition Ozüng yanglutsü aser Nagaland Dry State ta sangdongtsü Government-i nangzük nung lumiba sentong anen.
11. 29th March 1990 nü Nagaland Assembly nung The Nagaland Liquor Total Prohibition Act 1989 pass asü.

Anungji nüburtemi yi ya atakatemba chiyungtsü ta angateta iba yagi asen taküm, kibong aser lokti memenendaktsütsü aser atakatemba chiyungtsü ajanga asen taküm atakatemba taküm masütsü ayongzük.

UN Council-i Christian Solidarity Worldwide agizük



London, April 25 (Agencies): April 19, 2017 nü United Nations Economic and Social Council (ECOSOC)-i Christian Solidarity Worldwide (CSW) agizükogo.

CSW ya alima nung religious freedom advocacy group ka lir aser UN committee kati nokdangba ajanga küm 8 tashi parnok magizüki aru.

ECOSOC-i tang parnok agizükba sülen Britain nung amenoka aliba CSW-i UN Human rights sendentem nung dentettsü.

ECOSOC nung züngsem 54 tsüngda vote agitepba nung CSW-i vote 28-9 angu. iba vote agütsütepba nung züngsem 12 maden.

CSW nung senior press officer, Kiri Kankhwende-i ashiba agi, iba jenjang ajanga CSW-i nisungtem anir arua UN teloktem tsüngdang kuli agütsütettsü.

Human Rights Council aser General Assembly alidang CSW-ia sentongtem ayonga agitettsü, ta laisa ashi.

Tang ya CSW-i mapa inyakba rongnung Sudan nung pastor aser activist ka puoka aliba chioktsü atema lir.

NGO committee-i human aser minority rights dak sendakba ashishitepba ken o tem atema inyakba teloktem nokdang. UN system nung tamangba yimsü sülen anidaktsü mesüra amangtsü atema

temetentem peria mali ta onoki meteta lir. Onok UN nung dendaktsüba ajanga item temetentem atema tali inyaktsü, ta Kankhwende-isa shisem.

Taküm February ita züngsem linüktemi CSW anema vote agütsürtem rongnung Pakistan, Vietnam, Turkey, India, aser Burkina Faso linüktem liasü.

CSW-i committee ajanga asüngdangbatem atema telangzüba ajak magütsü ta item linüktemi ashi, saka Britain nungi UN Ambassador Matthew Rycroft-i, "CSW-i züngoktsü atema telatetba ajak ajangtetogo" ta ashi aser paisa committee-i tasüngdangba 80 atema telangzübatem agüja liasü.

India nung Audio Scripture Ministries-i app tasen ka yanglur

Bangalore, April 25 (Agencies): Audio Scripture Ministries(ASM)-i India nung app tasen ka yangludar aser iba ya taküm küm sayatsü sentong lir.

Iba app nung audio Bibles aser Gospel materials adentsü aser India nung oshi balala nung angutsü.

"Tang tashi nung onok design prototype nung lir. Onoki icons yangludar aser app tenüng atema bilemdar. Onoki taküm kümsa iba app renema sayatsü sentong lir" ta ASM India-Asia Director, JP Sundararajan-i ashi.

Iba app tasenba ajanga India nung Osangtajung prokba maparen ulushitsü aser ministry inyakyim nunga temelenshi adoktsü, ta Sundararajan-isa ashi.

"Küm ana tsüngda India nung alirtem teimbaka data aser smartphone tem ajanga sendakteptsü. China sülen India ya smartphone market tulutiba rongnung tanabuba lir aser U.S jakdang lir" ta paisa shisem.

India nung smartphone kanga amshiaka nüboritem aika azüngtsü-zülutsü junga memetet, anungji parnok parnok nem tezüluba nung Bible app agütsüba

ajanga meperir. Aji agi, India nung ASM indang audio Bible distributions kanga sapur. Audio Bible app ka aliba ajanga pastor tem aser tamangertem audio nung Tsüngrem o angutsü atema tangaleni aotsü nüngdak madoktsü, ta Sundararajan-isa metetdaktsü.

"App yanglutsü atema senotsü bushitepba asoshi sarasademjang. Onoki iba app renemtsü atema \$50,000 shi nüngdaker. Maneni onoki yangluba app amshitsüpurtem atema sarasademjang" ta paisa mepishia ashi.

ANOGO ABEN TSÜNGREM DEN

DAWID CHUBA SARASADEM

"Ni Kibuba dang langka asüngdangogo, ni ibaji bushitsü, oda kü arishi anogo tepiyong Kibuba kidang lia Kibuba tobur ajungba reprangtsü, aser tenla kidang Pa dang asüngdangtsü"

- T. Ken 27:4.

Sarasadem ya teyanglur Tsüngrem den sensaksemba. Teyanglur aser teyangluba ana tsüngda apu alaba. Ka taginüba ka-ti angateta yaritepba mesüka lir. Tsüngrem chirtem asoshi sarasademji tango sashiba mesük (breathing).

Tango sashiba kodang nisung nungi anendir paji tasü. Anungji Khrista akaba taküm ka asoshi sarasadem ya leniba ajok mesüka lir. Pai jembiba angashir, anungji ibaji angaa anogoshia Pa den jajar. Nüngdak ajak ashir, koda amshitsü ajak Pai metetdaktsür aser agütsür, pai jembiba aseni angashir ibaji sarasademji lir.

Dawid chubai Tsüngrem dang mapang ajak nung pa aser nübur asoshi mepishi aser Pai angashi aser agütsü. Pai ibaji maneni nendaka arishi tepiyong tetezü mangu tashi bushitsü pa tenangzüka ba ayuba angur. Arishi tepiyong Kibuba kidang alitsü aser Pa tobur ajung küli asütsü Dawid nükjidong.

Tsüngrem bushitsü pai tüzüba ama asenokia sarasadem asen sübotsü sür Pa den jajatsü ayongzük.

SARASADEM:

O Kibuba, mapang ajak nung Nü den sensak asemtsü tejangraba poktetdakjangma. Amen.

METETDAKTSÜR

14th May 2017 anogo nung Dimapur Waromung Fellowship anük-apangtemi sentong bendanga agitsü lir. Anungji 29th April 2017 Saturday anogo 1:00 PM nung Neighborhood Gospel Church, Circuit House Colony, Assam Rifle camp anasa, anük-apang ajak atenshitsu metetdaktsür.

Teküboklen agüja aliba contact no nung tongtepreteptsü mepishir.

Dr. P. Yanger Longch
9856824240

Rev. Alem Jamir
9615283914

China nung pastor ka kinungtsü dang ghonda 15 asüngdangya asü



(File photo)

Shenzhen, Guangdong, April 25 (Agencies): China kübok Guangdong province nung ketdangsertemi pastor ka kinungtsü dang ghonda 15 tashi asüngdangya asü.

Taoba Brihostibarnü ketdangsertemi arogo ka mitdang pastor kinungtsü la arogo nung tekolak ta ashiba ajanga la dang asüngdangya asü.

April 20, 2017 nü police-i Buji Church nung senden ka alidang ao. Parnok tsüngdang ken o ka benokba atema parnoki iba arogo miter ta ashi aser arogo lapokba indang kuli meshi.

Iba mapang police-i arogo tanishir shiba ta asüngdangdang, pastor Zhang Fei kinungtsü Zhang Rongxian-i la ta ashi.

Iba sülen police-i la anir ao aser ghonda 15 shi asüngdangya asü. Idangji sorkar ketdangsertemi la indang azü tüzük aser la indang fingerprints agizüka

ayü. Zhang Fei-i shiba agi, police-i arogoji ozüng alame lapokba ta ashi aser telok mesenteptsü tetuyuba agütsü.

Khristantemi ashiba agi ketdangsertemi Shenzhen nung aliba tenlakitem nung 'firefighting equipment' reprangdang ta tatemzüka nung ajemdaker mita aoer.

"Anogo ishika tejakdang police-i onok indang firefighting system reprangdang aru aser idangji parnoki temulung masür ta ashi. Onoki parnok dang kechi asü nung ajungtsü ta asüngdangdang, fire extinguishers kar alisemang ta ashi aser iba amaji onoki alisem. Tang parnoki mapang shia tendangi arur aser onok indang ali kibur dang onok meindoktsü atema ashir. Ajisüaka, onoki küm ana atema contract agitep aser ano ita 18 anünga lir" ta Zhang-isa metetdaktsü.

OLONG PAITEP # 4403

1		2		3		4		5	
						6			
7						8			9
					10				
11	12		13		14			15	
			16						

TIPLÉN

- 1. Ajurunüa bilem - (8)
- 6. Arem ozü ka - (4)
- 7. Mi apudak - (6)
- 8. Taluposa / Jenti - (4)
- 11. Mangmang - (4)
- 14. Atangji masü - (6)
- 16. Ashibangba - (8)

LANGTSÜNGLEN

- 1. Mulung atoker - (7)
- 2. Tetsü tepok nung tanur meyibangba - (5)
- 3. Meimchir - (6)
- 4. Ajungbena tsübua ait - (5)
- 5. Teki - (5)
- 9. Atsük tapu ka - (7)
- 10. Tekangshi / Touashi - (6)
- 12. Saklok - (5)
- 13. Meshirang / Temang junga aliba - (5)
- 15. Arameso - (5)

OLONG PAITEP # 4402 TELANGZÜBA



TIPLÉN :

- 1. Lensa, 3. Osang, 5. Mezüng, 6. Agi,
- 7. Süra, 8. Tebutem, 9. Amen, 12. Odi,
- 13. Asayar, 14. Angsü. 15. Agima

LANGTSÜNGLEN :

- 1. Lamén, 2. Sangken, 3. Omen,
- 4. Asüngküm, 7. Sendong, 8. Tejang,
- 10. Tanga, 11. Tazü.

Noksa nung meputepi aliba tesem 20 bushiang



TANÜBO NAI LANGZÜANG


Q: Koba linük nung 15buba International Musculoskeletal Congress (IMC)-2017 ayonga akatsü?

- [A] India [B] China [C] Japan [D] South Korea

(Taruba adok nung onoki langzüsü)

YASHIADOK TELANGZÜBA : 55%

Tepela Tasoba Anogo



Tanur asoba anogo nung salem osang den noksa angati adokdeksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tirymyim@gmail.com nung yokang mesüra Tir Yimyim bureau tem nung agüjang.

1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :

NAIA YA METETER MA



Bollywood film 'Newton'-i tawa 2017 Hong Kong International Film Festival nung film tajungtiba award nguogo. Amit Masurkar-i direct asüba film "Newton" nung Anjali Patil aser RajKumar Rao natia shilem agia lir. Iba film ya 67buba Berlin Film Festival nung mezüng sayaa liasü, aser iba nungji International Federation of Art Cinemas (CICAIE) award ngua liasü.

SUDOKU # 3516

2		7	8	1					
8		2		6	4	5			
6	1		3				2		
	8		4	5	9		1		
7	5	1		9	3		6		
2	1				5	4	7		
	4					9			
9	2								
3	6		9	2	7	1	8		

TELANGZÜBA # 3515

7	5	8	9	2	1	6	4	3
4	2	1	7	3	6	9	5	8
3	6	9	4	5	8	7	1	2
2	8	7	5	6	4	3	9	1
6	4	5	3	1	9	2	8	7
9	1	3	8	7	2	4	6	5
5	9	2	6	8	3	1	7	4
1	7	4	2	9	5	8	3	6
8	3	6	1	4	7	5	2	9


OJANG LUTEP # 4008


- ISATSHAAK : □□□□□□□□
- GTENINMISU : □□□□□□□□□□
- NTÜA : □□□□
- UNGAAJ : □□□□□□
- SAAA : □□□□
- SÜMA : □□□□
- STATÜRU : □□□□□□□□
- MTEAA : □□□□□□
- EBIALM : □□□□□□
- EINKRYA : □□□□□□□□


OJANG LUTEP TELANGZÜBA # 4007


SHIA METETA ALIRTEMIA ASEN LIMA
AJUNGTSÜ ASOSHI KECHA BALAKA MEINYAKER


Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):


- 


Aries
21/3-19/4
Nai tanü tashi maitba nisung kar den mapa inyaksü bilemetsü, saka iba ajanga nü mapa nung takok mangutsü. Anungji kanga junga shisadangang.
- 


Taurus
20/4-20/5
Tanü nü mapa nung meinprongtsü nisung aika alitsü südi. Anungji nü mapang tesünep nung süyidaksütsü asoshi sentong yangluang.
- 


Gemini
21/5-20/6
Tanü nai medemertem den külemi kazütsü jangratsü. Anungji nai medemer teshiemtet den sensaksem akatsüla aser sendoka adoktsüla nisungbo anioktsü temerang.
- 


Cancer
21/6-22/7
Tanü nai nür kinunger aser medemer chichibatem den mapang indoktsü bilemetsü. Saka parnok dak kasa tejangra ali mali, aji nai metettsüla.
- 


Leo
23/7-22/8
Tanü na kanga kümdangtsü mapang lir. Nü yimya tangari metettsüsa mapang arutsü, anungji nai nü shisatsü ajungabo temettdaktsü.
- 


Virgo
23/8-22/9
Na tangar den külemi mapa inyakra tamakok alutsü südi. Anungji nü kisung mapa tongtibang kar inyaksü merangang aser nai takok angutsü.
- 

Libra
23/9-22/10
Rarapangsen aser mangatettep kar tanü nai ajurutsü akok. Anungji nai parnok den angatettepba mapang kanga shisadanger jembitsüla.
- 

Scorpio
23/10-21/11
Tanü tangari naji shibar kanga jangja metettsü. Anungji mela-mela mit madoktsü merangang, kechiyong iba ajanga alimai na metettsü.
- 

Sagittarius
22/11-21/12
Nü taküm jenjang shisadangtsü asoshi tanü anogo kanga tajung lir. Samar aliba tanüla anir arutsü sentong yangluang aser nai takok angutsü.
- 

Capricorn
22/12-19/1
Tangar den sensaksemba mapang nü jenjang kanga junga shisadanger shilem agiang. Nü mapa angatettsü merangang aser nai takok angutsü.
- 

Aquarius
20/1-18/2
Tanübo nai jangraba sülen alima anidaksüsa sentong kar yanglua inyakang. Medemertem nungi shisa agiang aser anogo tajung asütsü.
- 

Pisces
19/2-20/3
Tanü nü anogo teraksa agi sünga alitsü südi. Saka nai mapang shidak amshira, item teraksa yanglushitettsü aser nai koktettsü.

Akshay Kumar-i award sentongtem nung Stuntmen tem nem kasa tetushi agütsütsü ashi



Mumbai, April 25 (Agencies): Stunt artists aser choreographer temnema award agütsüba sentong ajak nung film actor temnem agütsüba tetushi kasa agütsütsüla, ta Hombarnü Akshay Kumar-i ashi.

Hindi film industry nung stunt artiste tem atema 'special

insurance scheme' ka lapoktsüba mapang pai ashiba agi, "Ni film nung jilushitsü asoshi maongka mangu tsüngda küm 10 tashi Hindi film industry nung stuntman ka ama shilem agi aru. Anungji stuntman temi paronk anogoshia chia ajemtsü asoshi pei taküm lendongi idaktsüba ni jangjaa meteta lir aser iba yongji parnok nem award sentongtem nung kasa akum tetushi agütsütsü nüngdaker ta bilemer."

Akshay aser Asia Heart Institute nung nungtuugu cardiac surgeon, Dr Ramakanta Panda nati 'insurance scheme' ya sangdonga liasü. Iba scheme ya stunt artist arishi küm 18 nungi 55 tashi parnok 380

atema lir. Iba schem nung maneni asür atema compensation lakh 10 agütsütsü densema lir.

'Insurance' dak sendakba indang jembidang Panda-i ashiba agi: "Akshay-i kü dangi film nung 'stunt' shilem agirtem yiruba aser treatment nüngdakba koda yaritettsü ta asüngdang aru. Pai kü dang mozüki nung parnok atema yipden kar mekaa yutettsü asü meyutettsü ta asüngdang. Aji saka parnok linük ajunga nung shilem agia senzür asünung insurance tajungba asütsü ta ni bilem. Anungji onoki stuntman tem nem iba facility agütsütsü insurance company den longjema liasü."

Elton John 'bacterial infection' agi shirang

April 25, 2017 (Agencies): Elton John South America tour sülen shiranga mozüki nung amongba sülen Las Vegas nung sentong balala nung shilem agitsüba aliba thiogo. Kentener ya Chile nungi aruba sülen takümaa samatsüsa 'bacterial infection' ka ajanga shiranga liasü.

Arishi küm 70 tain kentener ya Las Vegas nung Caesars Palace, Colosseum nung 'The Million Dollar Piano' sentong nung shilem agitsü asoshi liasü, saka pa mozüki nungi tang ang adoker temang anepaluba mapang lir, anungji item sentongtem tanga anogotemi atsüintsüsa akümtsü. Pa iba tashidak menar mozüki 'intensive care' nung anogo ana tashi yua liasü.

South America tour kanga takok ngua agiba sülen Elton mejangjaba 'bacterial infection' ka agi tonga liasü, ta Elton osangbeneri yashi ashi. Pa Santiago, Chile nungi meyipa arudang tayimtsü nung kanga mejungi shirang tenzük. U.K atongba sülen pa doctor-i mozüki nung anioka infection indoktsü



atema temang anepalu tenzük.

Elton mozüki nungi Honibarnü yokogo saka pa hopta isheka atema kidang mozü balala agia anisüngzükdar. Yamala 'infection' ya kangabo bulua madoker aser kanga tesashi lir. Aji saka medical team-i iba tashidak kanga kera puteta kanga takok ngua pa temang anepaluogo. Pa yakta temang akiyimi arua aneptsü imlar, ta osangbenerisa ashi.

Las Vegas nung show tem athitsüba dang masü, saka Bakersfield, California nung May 6 nü agitsü aliba sentong dena athitsüsa akümtsü. June

3 nü London nung Twickenham Stoop nungi tenzüka UK aser Europe sema senzütsü aliba sentongtembo kasa anogo nung dang agitsü.

"Ni ni sapurtem dang parnok tezüdangdaktsüba atema tatok meshir. Maneni ni anepaluba medical team dang kanga pelar," ta Elton-i ashi.

Elton ano September nung Australia nung shilem agitsü imlar. Iba den külemi pa December 8 nü Dubai, United Arab Emirates, Live Amphitheatre nung Autism Rocks Fest nung shilem agitsü renema lir.



Mumbai, April 25: Mumbai Indians mentor Sachin Tendulkar 44buba tasoba anogo amongdang par telok den cake alemba mapang tangokba noksa nung angur.

TAN HOPTA ATEMA - KOMA SÜLA ?

Q. Taruba election nungbo constituency shia nung political party aser Independent party shia Fund Raising Committee shima candidate yari nunga koma süla?

Olong 20 shi nung April 28, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.

Oscar nung sempet agütsü dang meyoktepba atema temolung nung aija bilemer: Faye Dunaway

Los Angeles, April 25 (Agencies): Actress Faye Dunaway-i ashiba agi, Oscar award agütsüba mapang actor Warren Beatty denati 'Best Picture' sempet 'Moonlight' film melena "La La Land" ta sangdongba atema temolung nung kanga aija bilemer.

Hombar aonung "NBC Nightly News" den interview ka nung lai iba sentong nung aibelenba atema kanga süngmangba den külemi iba sülen kanga dang temolung nung aija bilemba lemsatepa liasü.

"Iba sentong sülen bilemdang nung ni langkabo inyakteter lila ta bilemer. Kodaser card temalen Emma Stone tenüing zülur aliba ni



Faye Dunaway

mangu?" ta Dunaway-i nemjema ashi.

February ita Oscar sentong nung Dunaway aser Beatty na Bonnie aser Clyde küm 50 ajungba anniversary nung Oscar indang sempet tulutiba

agütsütsü asoshi longjema liasü.

Aji saka dena nem envelope tai agütsü. 'Best Picture' akoker sangdongba envelope melena La La Land nung shilem agiba atem Emma Stone nem 'Best Actress' sempet agütsüba envelope agüja liasü.

Sempet sangdongba card lapoka reprangdangba sülen Beatty tatsüka bangkaa lir ang Dunaway dang iba osang sayua liasü.

"Pai card agizüker sülen kecha mashi. Pa kü tsütsü meyipa reprang aser loktia ken longa reprang. Ni bilem pa mapang atsüzüksü asoshi meranger kechiyong pai yamajisa asür," ta Dunaway-i ashi.

Flipkart Apple Days: iPhone 6 jenjang 25,000, iPhone 7 jenjang 47,999

April 25, 2017 (Agencies): Flipkart-i 'Flipkart Apple Days' sentong tenzükogo. Iba anogotem nung customer tem nem iPhone aser tanga Apple product tem jenjang kanga tajemba agi agütsütsü.

Iba sentong nung iPhone 7, iPhone 7 Plus, iPhone 6, iPhone 6S aser iPhone SE

jenjang tajemba agi angutsü.

Jenjang ajemer akütsüba rongnung iPhone 7, 256GB tajemba nung angutsü. Iba phone ya shidakba jenjang dang nungi sen 20,000 agi tajemba angutsü. iPhone 6 (16GB) sen 25,000 agi angutsü aser tanga Apple product tem nung 'cashback' aser

'exchange bonuses' dena agütsütsü.

Kasa mapang nung iPhone 6S jenjang 39,999 agi angutsü.

MacBook Air shilem 10 agi tajemba nung angutsü aser MacBook Pro atemaa 'exchange deal' tajung aika angutsü. Iba sentong ya April 26 nü tashi alitsü.

'Personal flying machine' ya 2017 küm tatemlen nungi ayoktsü yimlar



Washington, April 25 (Agencies): Silicon Valley nung Google co-founder, Larry Page-i yarisema anüing nung nisung mener senzütsü tayimtsü yangluba ya taküm küm tatemlen nungi ayok tenzüksü yimlar, ta Hombarnü video ka ajanga sangdongogo.

"Kija mener anüing tom nung senzütsü asoshi gari yanglutsü atema bongmangba ya asangsang kümdaktsütsü onok nükitong lir. Iba gari ya yanglutetba sülen alima nung maongka jenti angutsü," ta Mountain View, California nung aliba Kitty Hawk company ajanga sangdong.

"Tandangtsü asoshi 'The Flyer', kija mener anüing tom nung senzütsü akokba machine tanü onoki sayur aser iba gari ya 2017 küm tatemlen nungi ayoktsü," ta company ajanga iba video nung ashir.

Mejangjaba tesem ka nung aliba awatsüing nung iba

tayimtsü ayamesoa anüing nung yimzua senzua iba tayimtsü ya video nung angur.

Iba tayimtsü arakzüksü asoshi 'rotor' 8-i mapa inyaker aser helicopter ama anüing-i yima tur alua anenteter. Iba tayimtsü tuozük seret 100 aser ghonda ka nung kilometre 40 tashi kera jajateter.

Iba Flyer ya tasen aser 'all-electrical aircraft' lir aser iba tayimtsü ya tendangogo aser lendong nungi kümzükteter, ta company ajanga ashir. Iba tayimtsü ya US nung jajadaktsütsü asoshi US Federal Regulations for Ultralight Aircraft temzüng kübok amshitsü melar.

Iba tayimtsü anitsü asoshi temelaba kulikaket kicha menüngdaker aser ghonda ana training agiba ji teperi lir.

"Tarutsü nung kija senzüsempongtsü asoshi temelenshi. #theFlyer prototype indang osang

angutsü asoshi @kittyhwakcrop nung join süang," ta Google indang pasasa aniba gari tebu, ta nungja agütsüsang, Stanford University nung computer science professor aser Kitty Hawk tir, Sebastian Thrun-i Tweeter nung zülutsü.

Iba tayimtsü alitsü atema company nung züngsem akümtsüla aser küm asem atema züngsem saru sen \$100 agitsü aser jenjang tajemba nung alitetsü, ta company ajanga metetdaksü. Iba tayimtsü jenjang ya taküm küm tom nung sangdongtsü.

Kitty Hawk ajanga ashiba agi iba tayimtsü ya taküm küm tatemlen nungi ayok tenzüksü saka tang sayuba 'prototype' dang nungi design balaka alitsü.

Europe nung aliba Airbus amala companytem aikati iba amala tayimtsü yanglutsü merangba mapang ka lir.

Wikipedia Co-founder Jimmy Wales-i Global News Website Wikitribune yangluogo

April 25, 2017 (Agencies): Wikipedia co-founder, Jimmy Wales-i Wikitribune amenloksü asoshi asadangdar. Wikitribune ya osang agütsüba service ka lir koba nung temolung aser takotet osangbenertem mapa külemi longjemtsür. Maneni iba ya osang taila prokba nokdangtsü atema lir.

Iba news website ya 'Wikitribune' ta nungja agütsüogo aser mapa inyaksangshi ajak tenla ajanga dang inyaktsü. 'neutral and factual' otsütem yanglutsü asoshi osangbenertem nem taa agütsütsü atema iba mapa yarirtem dang ita shia sen £10-15 tenlatsü asoshi asüingdangtsü. Iba service ya teyari agütsürtemi tenlaba dak ajemdaker inyaktsü aser advertisement maliba service ka asütsü asoshi nükjidong lir.

Facebook aser ibala mesükba technology temi osang taila prokshiba menokdangtetba atema aitsüba mapang ka nung iba sentong



amenloksü asoshi asadangdar.

Jimmy Wales-i ashiba olen osang ka ajanga ashiba agi, Wikitribune news ya nüburtemi kümtetba aser nüburtem asoshi lir.

Aji saka Harvard University Nieman Journalism Lab, director-i ashiba agi, parnok senotsü amshiba aser bendenba yimya ajanga tibelemba ama meinyaktetsü.

Iba schem nung advisor tangatem rongnung journalism lecturer Prof Jeff Jarvis, US law professor Larry Lessig, Silicon Valley 'venture capitalist' Guy Kawasaki, aser actress Lily Cole nung densema lir.

Donald Trump-i anünglak nung alir NASA Astronaut den jemb

Washington, April 25 (Agencies): National Aeronautics & Space Administration (NASA) indang Astronaut, Peggy Whitson-i International Space Station (ISS) nung otsü tasen yanglua tua aliba tepela lemsatepa US tir, Donald Trump-i la den jemb.

"Commander Whitson, America nung astronaut-i anünglak nung aliba otsü nai tasen yanglushiogo, anogo 534 aser anu züingdagi," ta Trump-i Hombarnü la den jembidang ashi.

"Iba otsü yanglushiba ya tesüingmangtsü lir aser asen linük tenüing nung tepela salem nüden lemsateper. Tanü anogo ya America nung anünglak nung jajaba anogo tongtipang ka kümogo," ta US Tir-i ashi.

"Iba otsü yanglushiba ya kü asoshi konang tulu lir aser küden külemi aliba telok teyari ajanga iba otsü ya yanglushiogo aser ni nüma danga bilemer," ta Whitson-i langzü.

NASA nung Whitson-i otsü tasen aika yanglua lir. Tetsür astronaut-i space station ketdangseba rongnung 2008 küm Whitson ya mezüngbuba aküm aser kasa mapa tetsüri anaben inyakba nung lai April 9 nung otsü tasen yanglu. Tetsür rongnungi anünglak nung timba jajaba otsü ya lai March ita yanglu. La arishi küm 57 lir aser anünglak nung tetsür astronaut tantsütüla ji la lir.

US Tir aser Whitson-na phon agi jembiba mapang Trump-i aika asüingdanga liasü. NSAS-i 2033 tashi nung Mars-i nisung yoktsü asoshi bill ka nung taoba ita Trump-i sign süa liaka Mars-i koba mapang nisung yoktsü, item amala astüingdang.

"Nü indang bill ajanga totuyuba agüja aliba ama 2030 meta nung yoktsü yimlar. Saka anünglak nung tayimtsü senzüba nung mapang aser rongsen aika nungdaker. Aser Mars tongtetsü asoshi alima ajungai yariteptsüla," ta Whitson-i Trump dang ashi.

Sen 3,999 aser 4,999 jenjang iV00Mi smartphone ana India nung sayaogo

New Delhi, April 25 (Agencies): China nung electronic yangluba company, iV00Mi ajanga Mongulbarnü India nung 'ME' series indang Me 1 aser Me 1+ smartphone sayaogo. Me 1 smartphone jenjang sen 3,999 aser Me 1+ jenjang sen 4,999 lir.

Iba phone anaprong nung 5-inch HD IPS display den 2.5D curved glass keta lir. Phone anaprong indang operating system ya Android Marshmallow 6 lir aser Android 7.0-i upgrade sütetsü.

Me 1 indang processor ya 1.2GHz quad-core processor, 1GB RAM aser 8GB internal memory keta lir aser microSD card nung 128GB tashi amshitettsü. Iba smartphone

indang tesülen camera ya 5MP aser LED flash lir aser tejaklen camera ya 5MP lir.

Me 1+ smartphone indang processor ya 1.2GHz quad-core, 2GB RAM aser 16GB internal memory lir (microSD card ajanga 128GB tashi inoka amshitettsü). Iba smartphone tesülen camera ya 8MP den LED flash dena lir aser tejaklen aliba camera ya 5MP lir.

"India nung shishilembaba nung rangloker, jenjang tajemba nung 'world-class technology' amshia item smartphone ya yanglua lir," ta iV00Mi India, Product Marketing nung Director, Jessy Liu-i ashi.

Iba smartphone tasenba ya online ajanga ShopClues nung April 25 ayatirm nungi alitetsü.

Maoists anema raraba asalentong reprangshitsü: Rajnath



Raipur (Chhattisgarh), April 25, 2017: Mongolbarnü Raipur nung Union Home Minister, Rajnath Singh aser Chhattisgarh Chief Minister, Raman Singh nati yashi Raipur, Chhattisgarh nung telungpurtemi CRPF amakdang asürtem nem akhüm agütsüba noksa nung angur. Kasa noksa nungsa Chhattisgarh Angh, Balramji Das Tandon aser Union Minister of State for Home, Hansraj Ahir na den tongti ketdangsertema angur.

Raipur, April 25 (Agencies):

Tanü Union Home Minister, Rajnath Singh-i yashi Maoists telungpurtemi CRPF sepaia amakdang asürtem sepaia 25 nem akhüm agütsüba sülen pai, Centre-i Maoists anema raraba aselentong melenshitsu, ta metetdaksü.

Singh tanep 10:30 ako meta Chhattisgarh yimtiba, Raipur tonga aru, iba sülen pai Mana camp tesem nung Chhattisgarh Armed Force indang headquarters semdanga asürtem nem akhüm agütsü.

Iba sülen pai state Chief Minister, Raman Singh aser tongti ketdangsertem den senden

ka mena liasü.

"Maoists telungpurtemi tribal nisungtemji parnok ajanzütsü atema amshir. Parnoki nüburttemji parnok jung ama amshir," ta Singh-i osangbenertem dang ashi.

Singh-i ashiba agi, Maoists-i state nung terenlok mapa nung timtem agütsüner.

Maoists telungpurtemi timtem agütsüba state ajak senden ka May 8, 2017 nü amentsü aser iba senden nung Maoists telungpur, Left Wing Extremism (LWE) samatsütsü atema o lemteptsü, ta Singh-isa metetdaksü.

Yashi CRPF amakba dak

sentakba nung Singh-i, iba ya tasümit mapa ka lir, ta aitsü.

"Asen tasütait sepaitemi taküm tenla agütsüba amajok mesüdaksütsü. Bastar tesem nung gari lenmang terenlok aliba ajanga telungpurtem jashir. Parnok sentong tamajungji takok mengudaksütsü," ta paisa ashi.

Tanü sepaitem nem akhüm agütsüba sentong nung Singh den Chhattisgarh Angh, Balramji Das Tandon, Chief Minister Raman Singh, Union Minister of State for Home, Hansraj Ahir aser state ketdangsertem den paramilitary sepaia tongti ketdangsertem dena liasü.

Passport taila ken o nung Chhota Rajan küm 7 tepoukdak ayutsü

New Delhi, April 25

(Agencies): Telungpur tetsüdi, Chhota Rajan den nisung asem passport taila ken o nung aija parnok küm tenet tepoukdak ayutsü atema tanü special court kati obendang agütsüogo.

Court-isa parnok shia dang senchi 15,000 chiogo.

Ken o angadanga sülen CBI special judge, Virender Kumar Goyal-i Rajan den tangartem nem temerenshi obendangji agütsü liasü.

Hombarnü Patiala House

Court-i iba ken o nung Chhota Rajan den sorkar ketdangser asem aija liasü.

Yaküm June ita nung Court-i Rajan aser taoba mapang passport ketdangsertem-Jayashree Dattatray Rahate, Deepak Natvarlal Shah aser Lalitha Lakshmanan nung anema ken o benoka liasü.

Par pezüpongla IPC kübok sections 420, 471, 468, 467, 419 aser 120B nung aser Passport Act kübok section 12 nung tai tonglokja liasü.

CBI -i ashiba agi, 1998-99 küm Bengaluru nung Chhota Rajan nem passport taila agütsü liasü.

Taoba mapang sorkar ketdangser asempronglaji bail nung chioka lir, saka Rajan bo tang tashi judicial ket nungsa liasü.

Rajan anema ken o 85 shi benoka lir, aser item ken o rongnung rakzükraktemba, nisung tepsetba, ozüing alema shibelenba aser temesepba mozü shibelenba densema lir.



New Delhi, April 25, 2017: Tawa China sorkari Arunachal Pradesh nung tesem pongu nem tenüing agütsüba anema Mongolbarnü New Delhi nung Arun Chetana Manch Delhi Chapter züngsemtem aser ASUD züngsemtemi Chinese Embassy anasa longkak aitba noksa nung angur.

BJP-i Hindu yimsü tenüing menütsür: Mamata

Cooch Behar (West Bengal), April 25

(Agencies): Ato Kilonser, Narendra Modi-i aniba sorkar maneni aija tanü West Bengal Chief Minister, Mamata Banerjee-i Centre sorkari linük nung nashi ajak nem Aadhaar ama unique identification number (UIN) agütsütsü benokba atema aitsüba den külemi 'BJP-i Hindu yimsü tenüing menütsür', ta aitsüogo.

Banerjee-i, "Reprangang, tangbo nashi-ia Aadhaar cards nüngdaker. Süra nashi mamatzü nüngdaker tanurtemi koba card nüngdaksü? Parnok nem raraba card agütsütsü asü?" ta asüingdang.

Unique identification numbers ji nashitem mittsü aser ozüing alema nashi shilebenba nokdangtsü atema Home Ministry-i tentetba committee kati benoka liasü.

Iba dak sentakba nung BJP Tir, Amit Shah-i anogo asemnü West Bengal nung nüboyimba mapang nung Trinamool

Congress tongti, Mamata-i BJP aija liasü.

Bharatiya Janatya Party-i telemsa adokdaksür aser rara proker, anungji iba party nung madentsüla, ta lai ashi.

"Ni ajak dang ya ajungshir, nenoki kechi inyakdir inyakaka BJP denbo madentsüla. Iba party-i nüburttem rongnung telemsa adokdaksür aser rara adokdaksür," ta lai ashi.

BJP-i Hindu tamangba yimsü tenüing menütsür, ta aija Mamata-i, Swami Vivekananda aser Sri Ramakrishna Paramahansa tangatbatem nung anidaker Bengal nungeri BJP-i ajungkettsüba Hindu sülen manidaksüla," ta ashi.

"Parnok ya Hindu nung masü. Hindu yimsü benokba nüngtem nung parnoki tamangba yimsü tenüing menütsür. Ramakrishna Dev aser Vivekananda nungeri tamangba yimsü tsüingda akhümtsübutepsü ajungshi aser iba Hindu tangatba nung onoki amanger," ta laisa ashi.

CRPF sepaia Mohammed-i Maoists 5 tepset



Raipur, April 25, 2017: Chhattisgarh, Raipur nung aliba hospital ka nung CRPF sepaia, Sher Mohammed-i osangbenertem den jembiba noksa nung angur.

Bulandshahr/New Delhi,

April 25 (Agencies): Yashi Chhattisgarh, Sukma district nung Maoists telok, People's Liberation Guerrilla Army (PLGA)-i Central Reserve Police Force (CRPF) sepaitem amakdang CRPF sepaia, Sher Mohammad-ia Moaists pongu tepseta liasü.

Mohammad-i telungpur pongu tepsetba dang masü saka par külen sepaitema aika kümzük. Tang pa Raipur hospital nung teyari agia mongdar.

Mohammed ya Uttar Pradesh kübok Asifabad Chandpur yimtsüing nungi lir aser pa tesüiba küm pongu tashi Chhattisgarh nung sepaia mapa nung alidang pai Maoists telungpur den aiben raraogo.

Mohammed tetsüi, "Linük atema kü kinüingbu taküm tenlaa asü. Sher (lar jabaso) CRPF 74 battalion nung lir aser ano ozü jabaso ka RTO nung inspector lir. Ni ozü semchira sepaia nung dena linük tenzükdaksüner.

Ozü jabaso atema ni nüma atanger. Pai telungpur den rara aser tanga sepaitema kümzük," ta ashi.

Hombarnü telungpurtemi amakdang CRPF sepaia 25 tepset aser tenet yirua liasü.

Osang angazükba agi sepaitemji chiyungtepba mapang nung telungpurtemi parnok amak.

CRPF nung tongti ketdangser kati, nikongdang 12:30 ako meta telungpurtemi amakdang sepaitemji kar chiyungzüker liasü saka parnoki raratsüsa renema maliasü, ano sepaia karbo techiyungdak liasü, ta ashi.

Amakba sülen telungpurtem jagi sepaitem indang raraba oset aika auyar ao.

Raraba osettem rongnung AK series assault rifles 13 aser INSAS rifles 5 densema prangpong 22, injang 3,420, AK magazine 75, INSAS magazine 31, UBGL rounds 67, bullet proof jackets 22, binoculars ana aser wireless sets pongu densema liasü.

North Korea nung Army tentetba anogomung amung



Pyongyang, North Korea, April 25, 2017 : People's Palace of Culture, Pyongyang nung April 24, 2017 nü Korean People's Army (KPA) tenteter kum 85 ajungba benjung amungnü National senden amenba noksa nung angur. Iba noksa ya North Korea indang Korean Central News Agency (KCNA)-i April 25, 2017 nü temai adoka sayuba noksa lir.

Seoul, April 25 (Agencies) : Mongulbarnü North Korea nung military tenteter kum 85 ajungba mung amungdang drill agiba mapang parnok tashi sayutsü asoshi injang shitakba aika khatoka mungogo.

Nuclear mesüra missile tendangtsü melena Korean People's Army (KPA) anogomung nung North Korea-i iba drill Wonsan anüdoklen amung, ta South Korea military sangdong ka ajanga metetdaksü.

Iba drill ya US aser South Korea na Yellow Sea nung agiba drill anogo den chitep.

US indang tzü telung nung jajaba rong tulutüba rongnung ka, USS Michigan-a Mongulbarnü South Korea tonga aruogo.

North Korea-i tashi toktepbä manenba ajanga US-i parnok nokdangtsü asoshi

sashia amaktsü jenjang ka tashi tonga aruba ajanga Korea Peninsula nung tebilemstü ulura kumogo, ta osangbenertemi ashi.

Military tentetba anogomung nung Pyongyang-i parnok meyong nuclear trok buba mesüra long-range ballistic missile kabosa tendangtsü imlatepa liasü.

"US aser rara atema tasa asartemi amak nungbo onokia osang kecha magütsü anüing, ali aser tzü ajak nung kodanga mongudangba yimya tesashi agi amaktsü," ta North Korea osangkaket, Rodong Sinmun nung shia lir.

Hombarnü North Korea nung KPA anogomung nü benjung amungtsü asoshi senden ka amen aser iba mapang parnok Washington military-i amakdang koma

langzütü iba tsütü olemtep agi.

"Onoki aiben shiaka tsükchirtemi onoki ashiba mangai raratsü merangra ozü army temi nuclear amshia alima nungi onok anema raratsü aliba tashi ajak meshimeshia samatsütsü," ta North Korea armed force nung Kilonser Pak Yong-sik-i ashi.

South Korea Unification Ministry-i, North Korea-i parnok amry tentetba anogo amung masü saka raratsü asoshi dang renemshi, ta ashi.

Tan hopta tatemlen US Navy strike group den aircraft carrier, Carl Vinson dena Korea Peninsula-i aotsü imlar aser ibaji ajanga ano tebilemstü tuluba akümer.

North Korea osangbenertemi, nungdak dang süra US indang aircraft carrier ji North Korea military temi khen dang akha nung khasatsütsü tashi lir, ta taoba mapang shiogo.

Pakistan:Kiralongrar 4 tasüba agi merenshi

Islamabad, April 25 (Agencies) : Mongulbarnü kiralongrar pezü tashi Pakistan Pakhtunkhwa province tepuokdak alenseta südaksü, ta military osang ka ajanga metetdaksü.

Rehmanuddin, Mushtaq Khan, Obaidur Rehman aser Zafar Iqbal nung ya Tehreek-e-Taliban telungpurtem liasü aser parnok tasü agi merenshitsü obendangji military okadaki

agütsü, ta Inter-Services Public Relations (ISPR) sangdong ka ajanga ashi.

Parnok ji civilian tepsetba aser Pakistan military den sorkar ketdangsertem tepsetba asoshi aitsü, ta kasa sangdong ajang ashi.

Par pezü apuba mapang parnok ajak ket nung bomb den prangpong aser injang bena liasü aser parnok okadaki parnok iabelenba nangzük.



Tokyo, April 25, 2017 : Mongulbarnü Tokyo Japan nung North Korea Policy atema U.S. Special Representative, Joseph Yun (abelen), Japan Ministry of Foreign Affairs Director General for Asian & Oceanian Affairs, Kenji Kanasugi (tiyong) aser Korean Peninsula Peace & Security Affairs atema South Korea nungi Special Representative, Kim Hong-kyun nung North Korea tebilemstü mejembi tsungda tangokba noksa ka yangi angur.

Ali mangatettep nung India lenji maotsü:China

Beijing, April 25 (Agencies) : Arunachal Pradesh nung Tibet tesem trok nem China-i tenüing melena jatsübaaji Dalai Lama-i state semdangba küpzüker masü, ajisüaka India dang linük ana tsüingda ali mangatettep nung China-i lenji maotsü sayurba lir, ta China nung mongin kati ashi.

West Normal University, China nung Centre for Indian Studies, Director, Long Xingchun-i, India-i acha ayanga Tibet nung tamang lenir, Dalai Lama nem Arunachal Pradesh atonga sendangdaksüaka Beijing-i kanga taochi sayua New Delhi anema kecha meinyak, ta ashi.

India nung pei linük dak dang tera yanger alir aser alima koma aorar memetetba nisung karibo New Delhi-i Beijing akoktsü amai bilemer.

Shitakba shidi süra 1962 kum India aser China na raradang India nungeri akoktsü liasü, ajisüaka parnok i tamakok angu, anungji parnok i item aibelentem nungi tan asütsüla, ta Long-i ashi.

"India nung osangbenertemi 14buba Dalai Lama-i Arunachal Pradesh semdangba ajanga India aser China na arrtsü mangatettep tesemlen aliba Arunachal Pradesh tesem trok nem China-i tenüing agütsü amai bilemer. Onoki tenüing melentsübaaji ajanga linük ana tsüingda ali mangatettep nung onoki lenji maotsü sayur," ta Long-i osangkaket ka nung adoktsü.

"Dalai Lama nem mangatettep aliba arrtsülen semdangdaksütsü asoshi India-

i aiben acha ayangja South Tibet tesem parnok kübok ayutsü meranger. New Delhi den tesendaktep tajung aliba ajanga Beijing-i tashiyim agi masü saka inyakyim kar ajanga dang India-i onok anema inyakba meyiptsürba lir," ta pai ashi.

Beijing-i Arunachal Pradesh ji South Tibet-a ta ashir. China aser India na Arunachal Pradesh atema 1962 kum rara tatsüka rara liasü aser iba raraji India-i makok.

"Beijing aser India na iba arrtsü tebilemstü ulura kumogo. 1962 Sino-Indian border raraba sülen linük ana tsüingda tesendaktep raksa. 2013 kum iba arrtsü bentettsü asoshi senden ka amenba sülen India aser China na 19 ben tashi ajurutepa senden menogo aser linük anaprongi iba tebilemstü azüoka yur tesendaktep meraksatsü meranga liyonga arur," ta Long-isa ashi.

Pai, "Linük anaprongi arrtsü tebilemstü nung kanga teyak mesangi yimjung aser tangatetba tajung nung ajaki agizükettsüa telemtetba agütsü nungdak," ta shisem.

Shitakba jembidi süra China-i India den tesendaktep tajung ayutsü asoshi kanga tongtibang süa bilemer. Mangatettep ajak azüoka yur rongsenkettsüng tsütü amalitepa, China nungi shishilembartem nem India nung rongsen inoka inyaktsü ajungshitsüla. Iba inyakyimji Modi-i tenzükba 'Made in India' inyakyim asoshi kanga tajangzük asütsü koba ajanga India rongsenkettsüng tali renloktü," ta Long-i ashi.

Nisung tepsetba atema Philippines Tir anema ken o benok

Manila, April 25 (Agencies) : Philippines nung nisung telok telok tepsetba aser meimchir dak ozüing alema inyakba asoshi Philippines nung lawyer kati International Criminal Court (ICC) nung linük Tir Rodrigo Duterte anema ken o ka benokogo, ta Mongulbanrü osangbenertemi metetdaksü.

Lawyer Jude Sabio-i kakak tapak 77 nung Tir aija zülur nüburtem ajaki meteta Hague court nung agütsüogo. Pai züluba nungji, "Tir-i kum 30 shi maneni aser memelenshi ozüing alema nisung tepseter mesüra nisung telok telok tepseter," ta shia aliba osangbenertemi metetdaksü.

Pai nisung 9,400 tepsetbaji 1988 kum nungi tenzükä tepsetbatem lir. Duterte ya iba mapangji Davao yimti nung mayor liasü aser ano tang pa Tir kümer külena temesepba mozü den rara ka tenzükä ano kum 10 tashi maneni nisung tepseter.

Pai nisung tepsetba osang ya meimchir temeten asoshi inyakerkem, Duterte sülen



anidakertem, osangbenertem aser Duterte tetuyuba nung nisung tepseter, Edgar Matobato nungeri ashiba lir.

Iba den külemi ano 'Davao Death Squad' nung dena aliba, police ketdangser nungi anisungzüker alisang, Arturo Lascanas-ia, Duterte tetuyuba nung paia nisung 200 shi tepsetogo ta kuli agütsü.

'Davao Death Squad' yagi Mayor Duterte-i ozüing anema aibelentem, sorkar anemertem aser osangbenertem tepsettsü tetuyuba agütsüba anga inyak, ta Lascanas-i ashi.

Onok dangi osang ka aruogo aser ibaji onoki timleni

asadangtsü. Onoki telemtetba agilii iba shidi zülusang nem osang agütsütsü aser kechiba onoki item telemtetba agi ibajia metetdaksütsü, ta ICC office ajanga metetdaksü.

Duterte atema otongdar, Ernesto Abella-i iba ken o benokbaji Tir jak nung anak paloktsütsü merangerba dang lir, ta ashi.

Arishi kum 72 tain, Duterte-i temesepba mozü anema rara tesashi ka tenzük aser 2016 kum iba rara tenzükba nungi tang tashi nung nisung 7,000 tepsetogo. Item tasürtemji timba ka temesepba mozü yoka amshir tilatem aser addict tem lir.

Centre-i Tribal...

(TAPAK 1 NUNGI...)

Naga tribal teloktemi tetsür nem shilem lemküksüba anema nokdak. Iba inyakyim ajanga customary laws nung kongshitsü aser Linük Temzüing Arrla 371-A nung Nagaland nem temeten agüja alibatem samatsütsü ta Naga tribal teloktemi ashir.

Parnoki tekong meranga nokdakba ajanga TR Zeliang-i chief minister menden toktsütsüsa aküm aser Naga People's Front tanishir Shurhodelie Liezietsu-i Nagaland nung Chief Minister 17 buba inyaksü agizük.

Nagaland nung ...

(TAPAK 1 NUNGI...)

Taküm tzünglu kanga karara arur aser iba ajanga Dimapur nung tzü atsüngdenba aser kilentzü yimdokdak tangbangba ajanga malaria adoktsü akok, ta Dr Medikhru-isa ashi.

Department-i Dimapur jila nung aliba kilentzü yimdokdak repringdangogo aser tasazükji kilometer 1600 shi lir. Kilentzü ayimdak ajak nung Gambusia affins ta ajaba merla entsü achiba ango chiokogo, ta paisa shisem.

Nagaland state nung 2030 küm tashi nung malaria agentsü atema alizüing atema Urban Development, Agriculture, Public Health Engineering, Work and Housing, Municipals, Fisheries, Education, NGOs, Private Health Providers amalatemala yariteptsüla, ta Dr Medikhru-isa metetdaksü.

OFFICE OF THE
MERANGKONG ADHOC TOWN COMMITTEE
No. ADC Tal/LB-4/PT/95-96/LIB
P.O. Tal - 796101, S.P. Dimapur
Dist - Mokokchung, Nagaland.

Ref No. Date 26/04/17**TENUNGSANG AGÜTSÜR**

Merangkong nungi senso tajung Lt. Sumameren aser Mrs. Tsukjemlema na jabaso Wb. Likoktemjen Yaden, temaba jenjang SDO, PWD menden ajanzükba asoshi Merangkong Adhoc Town Committee aser nüburtem ajaki konang nungsang agütsür. Tarutsü nung asen nübur anitsü asoshi Tsüngremi temjena moajang ta, pa aser par kibong asoshi asen Tsüngrem dang temoatsü meshia sarasademtsür.

Sd/-

**T. Kora Yaden, Secretary,
Merangkong Adhoc Town Committee**

OFFICE OF THE
GOVT. HIGH SCHOOL LONGCHEM ALUMNAE ASSOCIATION
H.Q. LONGCHEM

Govt. High School Longchem (Estd. 1968) Alumni Association Alumni meeting 21st April 17. Alumni member's Dr. N. Benjong Aier Hon'ble Parliamentary Secretary CAWD & Taxes Nagaland kidang mezüing senden mena liasü. G.H.S Longchem tenzük 2018 küm 50 years (Golden Jubilee) abensaba benjongmong amongtsü teloki molunga agizük. Iba Golden Jubilee takok ngua acha-ayangtsü asoshi Nübu 15 (fifteen) agi akümba planning committee ka Wb. Yapangtemjen (Nokpu) Convener aser Wb. Moameren Imchen (Lirmen) secretary shim. Iba senden nung teloki iba GHS Longchem tenzükba küm nungi tanü tashi zünger alir ajak bio-data bendentsü renem.

Aser Japukong nung dak alaka (Non-Japukong students) Alumni ajaki iba **mobile No. 9612975831** nung agüja aliba data (June 2017) tashi nung tongjang ta sangdonger. Iba Golden Jubilee takok ngua aotsü asoshi Alumni members ajaki shilem tajung agitsü yimla atar.

1. Name:
2. Village /Tribe
3. Year of study
4. Present status
5. Educational Qualification
6. Contact No.

(IMOTEMJEN LONGCHAR)

Press Secy

**Alumni Association, G.H.S. Longchen
9612975831**

21 Buba Watsü Mungdang Senden Sentong

Anogo : 27 - 28, April, 2017
Tesem : Town Hall, Mokokchung
Omen: Aowli Temelenshi
(Sustainable Change)



Tongti O Jembirtem : Wt. Taljungla
Director, Ao Theological Association
Wt. Chubala Wai
Member NPSC
Mungdang Jungshir
Longmisa Senso Tetsür Telongjem Mokokchung

Sentong Lenir : Mendenpur

SENTONG I

Anogo: 27 April, 2017 Mapang : 4:00 Ako (Nikongdang)

- Asür Bilemtetba Mapang : Wt. Lemtila Asso. Pastor (w)
Mokokchung Baptist Arogo
- ❖ Aotsür konang naroküm ola : Wt. Dr. Chubatola &
Kr. Limasena Jamir
 - ❖ Pela agizükba : Tir, Watsü Mungdang
 - ❖ Sarasademtsü : Wt. Asüngla, Women Leader,
UCF, Mokokchung
 - ❖ Metetpela mapang : Tongti zülur
 - ❖ Tepela O : (i) Wb. Sushil Kumar Patel, IAS
Deputy Commissioner
Mokokchung
(ii) Tir, AKM
 - ❖ Temeja ken : Kr. Esther Telok
 - ❖ Ni ya shiner : Wt. Chubayangla Longkumer
Rtd. Principal FAC
 - ❖ Mungdang Jungshir :
 - ❖ Onük : Shisatsü nung Aowli Temelenshi
 - ❖ Tejembir : Wt. Chubala Wai
 - ❖ Tatem sarasadem : Wt. Taljungla, Asso. Pastor (W)
Molungyimsen Baptist Arogo

SENTONG II

Anogo : 28 April, 2017 Mapang: 9: 00 Ako (Anepdang)

- ❖ Sarasadem : Wt. Takala, Deacon
Artang Baptist Arogo
- ❖ Tajungshi O : Tir, Ao Senden
- ❖ Mungdang Jungshir :
- ❖ Onük : Aowli Temelenshi
- ❖ Tejembir : Wt. Taljungla
- ❖ Temeja ken : Salangtem Watsü Telen
- ❖ Lemsana mapang : (20 minutes each)
Rongsenketsüing nung Aowli
(i) Wt. Rongsenienla Aier, Rtd. Director
Agri. Kohima, Nagaland
(ii) Dr. Sashiyangba, District Project Officer
Department of Land Resource, Mokokchung
- ❖ Onir : Wt. Dr. Imlirena Walling
- ❖ Tatem Sarasadem : Wt. Sangyula Imchen,
Asso. Pastor (W)
Mangmetong Baptist Arogo

LOKTI CHIYONG**SENTONG III**

Anogo: 28 April, 2017 Mapang: 1: 30 Ako (Anüngdang)

- ❖ Sarasadem : Rev. I. Amenla
Asso. Pastor (W) MTBA
- ❖ Yimten yimli telemtetba : Wt. L. Bendangla, Taoba Tir,
(20 Mins)
- ❖ Osangtem agiba mapang : Tongti Zülur Osang
Bodbar Bazaar Osang
Tentet Luden Osang
Tetsür Temeden Osang
Pangzüing Luden Osang
Auditors Osang
Nüngtet Luden Osang
- ❖ O Lemtep mapang :
- ❖ Menden melentepba mapang: Wt. Achila Imsong
Taoba Tir (WM)
- ❖ Menden tatem O :
- ❖ Mungdang shipangtsür : Ungma Baptist Arogo Youth Ministry
- ❖ Tatem sarasadem : Wt. Kataro, Asso. Pastor (W)
Chuchu Town Baptist Arogo

TEMETETSÜ

1. Onük jembir shia 30 mins, Tajungshi, Tepela O aser Ni ya shiner jembir shia 10 mins.
2. Agenda lira 10 April 2017 tashi nung Ketdangpur ket tongtsütsü metetdaksür.
3. 28 April, 2017 anepdang sentong mapang Watsü Mungdang atema tenla sarutsü.
4. Aotsür ajak küm 18 tema 21 buba Watsü Mungdang nung adentsü pelashishia jaoker.
5. Iba Mungdang asoshi ajaki sarasadem atadi.

GOVERNMENT OF NAGALAND DIRECTORATE OF INDUSTRIES & COMMERCE

ADMISSION NOTICE

Applications are invited from the eligible candidates for Admission to 'Diploma in Tool & Die Making' Course (4 years specialization course in tool design and manufacturing) at Nagaland Tool Room & Training Centre, Dimapur.

Qualification:

- Class 10th Passed with English, Maths & Science.
- Direct admission - Grade B & Above
- Age should be between 16 to 19 years. (SC/ST candidates have relaxation of 3 years in the upper age limit).

Date of Entrance Exam: 15th May, 2017

Features:-

- Stipend amount of ₹ 500/- p.m. during the course or ₹ 600/- p.m. NEC stipend for meritorious students of HSLC exam.
- NTTTC Scholarship (monthly) from the institute for merit students semester Wise.
- Incentives for students with 90% and above (month wise) in attendance.
- Bus service available.
- Direct admission - Grade B & above.
- Company allowances between ₹8,000/- to ₹15,000/- p.m. in the 4th year during On-the-Job-Training/Industrial training period.
- Earning while learning Scheme shall be extended to willing candidates.
- Students of Diploma in Tool & Die Making are eligible for SBI Education Loan.
- 100% placement assistance in Privates/Govt. Sectors.
- Prescribed Application Form with prospectus @ ₹200/- can be collected from NTTTC, Dimapur during Office hour or can be downloaded from the website at <http://www.nttcdimapur.org.in>

Contact: 9436005766 /9856084073/ 9612160771 / 8413870785 (m)

Sd/- L. Bendangliba, Director of Industries & Commerce

IPL:Umpire den asatepba atema Rohit Sharma dang senchi achi



Mumbai, April 25 (Agencies) : Tang tasayadak Indian Premier League (IPL) asayamung nung Hombar aonung, Wankhede Stadium nung Mumbai Indians aser Rising Pune Supergiant telok na asayadang Mumbai Indians Captain Rohit Sharma-i umpire decision ka aitsüba ajanga pa indang asaya ka indang fee tesadang (50%) senchi achi, ta IPL acha ayangba telok sangdong kanga ajanga metetdaksü.

Iba tatalokbaji over tatebangbuba nung atalok. Iba asaya nung Mumbai-i runs asem agi Supergiant telok madak tamakok angu. Supergiant teloki runs 160 yanglua yutsü saka parnoki

over 20 nung 157/8 ang yanglutet.

"Sharma-i IPL Code of Conduct for players and team officials kübok 2.1.5, Level 1 aibelen nangzük. Rohit-i Hombar aonung aibelenba zünga tan asayamung nung Level 1 kübok tanaben buba aibelener.

"Level 1 kübok aibelenertem asoshi match referee-i kechi obendang agütsüdir ibaji tatem asür," ta sangdong nungji shia lir.

Mumbai Indians teloki iba asaya akoktsü asoshi ball 4 nungi runs 11 angutsü nüngdaka lia par telok asoshi runs timtiba yanglusang, Rohit-i Umpire S. Ravi tai aputsü merang. Pune nungi bowler

Jaydev Unadkat-i slow ball ka off stamp nungi tera pilar aonba wide magütsüba atema Rohit-i umpire den tai putepa liasü.

Rohit Sharma-i iba ball ji wide ta bilemer mazük toktsü, ajisüaka umpire-i iba ball ji wide masü aser tatetsü mali ta ashiba ajanga Mumbai captain-i ashishitep.

Rohit-i pa yimya agi aser o agi Ravi dak tai tonglokja raraba ngua square-leg umpire A. Nand Kishore-i arua bendangtsü.

Iba ya matalokdang Kolkata Knight Riders den asayadanga pai umpire-i ashiba ka anema ashishitepa liasü. Ajisüaka idangjibo match referee-i pa temerenshi ang merenshir senchibo machi yutsü.

Dubai nung WWE atema nisung bushitsü

New Delhi, April 25 (Agencies) : World Wrestling Entertainment (WWE)-i Dubai semdangtsü aser anogo pezünü, April 26 nungi 29, 2017 tashi munga parnoki tarutsü mapang asoshi WWE Superstars bushiba mapang agitsü, ta Mongulbarnü parnok sangdong ka ajanga metetdaksü.

Iba sentong ya tan tasen yangluba Dubai Opera House

nung ayonga akatsü aser yangji Middle East aser India nungi wrestling nung sempet aketertem, tetsür aser tebur nisung 40 nem maongka agüja shimoker WWE Performance Center, US nung training agütsütsü, ta WWE sangdong nungji shia lir.

Iba tetoktepba nung saisapong tapu balala asayatem ajaki shilem agitsü.

Dubai nung iba sentong ayonga akaba ajanga WWE-i alima rangben nung sempet alirtem nem maongka agütsüba jungkai adoka sayur. WWE-i tawa tanü Europe nungi rugby aser football asayatem, India nungi Kabaddi asayatem aser melangtepertem aser China nungi martial arts asayatem aser tsüngtepertem rongnungi sempet alirtem bushia liasü.

Arishi küm 101, Man Kaur-i 100m asemtep nung takok angu



Auckland, April 25 (Agencies) : World Masters Games nung India tsür arishi küm 101 tain, Man Kaur-i 100 metres asemtepba nung takok angu.

Man Kaur ya Chandigarh nungi lir, aser arishi küm 100 ser temapur 100 metres asemteper

pa kija liasü. Lai minute ka ser second 14 nung alizüing tonga asem.

La ano Bodhbarnü 200m asemtepba nunga shilem agitsü renema lir aser iba den külemi ano 'shot put' aser 'javelin throw' asayatem nunga shilem agitsü

tenüing agüja lir.

Man Kaur nem lar jabaso, Gurdev Singh-i asemtsü training agütsür aser lai tetoktepba aika nung shilem agia takok bener aruogo. Lar jabaso ya Canada nung alir aser pa-a asemteper ka lir.

Lar jabaso-i ajungmesoba ajanga Man Kaur-i arishi küm 93 astiba mapang nungi asemtepba nung shilem agia arur.

Lai alima tesem balala nung Masters Game tem nung shilem agia arudang medal 20 tashi ngua lir.

"Ozü jabaso-i sayuba ni angar. Ni anogo shia pa den training agir. Ni kü temang anema aser yakyaka liner. Ni masü tashi asemtepba nung shilem agitsü," ta lai ashiba osangbenertemi metetdaksü.

vivo IPL 2017
APRIL 26, 2017 ASAYA
 Pune VS Kolkata - 8:00 PM
APRIL 25, 2017 ASAYA OSANG
 Tzünglu aruba ajanga Bangalore o Hyderabad na masayatet.

Frolic Cup: Anogo tenetbuba asaya osang

Dimapur, April 25 (TYO) : Tang Medziphema nung tasayadak, Frolic Club asayamung tenetnü buba asaya telok ti asayaa liasü, ta Frolic Club Tir Kepe Nakhro aser Games & Sports Secretary Nizhalhu Kuotsu nati sangdong ka ajanga metetdaksü.

Iba asayamung tenzükünü nungi anogo shia asaya pezüzü asaya arur aser tanü, Mongulbarnüa quarter final asoshi team ti kanga toktepa asayaogo, ta sangdong ajanga ashi.


Kasa sangdong ajanga ashiba agi, tanep mezüing asaya nung taoba küm takok marok bena aliba telok, Tsiepama Youth Organisation aser Arogo nungi lanurtemeja, BKK TBCM na tsünga asayadang Tseipama Youth Organisation-i BKK TBCM madak 5-3 agi takok angu. Anepdang 8:30 ako nungi tenzüka asayaba, tanabuba asaya nung Kuki nung club ana, club KYC 'A' aser KYC 'B' na asayaa

liasü. Iba asayaji KYC 'B'-i 5-0 agi akok.

Nikongdang mopung ka tatsük (31°C) süaka MVYO aser Zoungam FC na tsüingda tasembuba asaya asayaa liasü. Iba asaya nung MVYO-i 7-1 agi Zoungam FC madak kanga junga takok angu. Asaya pezübuba tenzüktsü anasa stadium sünga nisung adenshia pelatepa liasü. Iba asaya nung Winfield FC, Medziphema-i 4-0 agi Young Generation, Old Piphema madak takok ngua quarter final tongogo, ta sangdong ajangasa ashi.

Bodhbarnü (26/4/17) asaya yamai alitsü :-

1. Starlit Maova vs Sporting Club, Phaijiang, at 7:00 am.
2. United FC, Medziphema, vs Khanglai FC at 8:30 am.
3. Khanakhurü Students' Union vs Liengai FC at 2:00 pm.
4. Molvom Youth and Students' Union vs Tribal FC, Dimapur, at 3:30 pm.



Seville, April 25, 2017 : Sevilla Football Club nungi Monchi-i sporting director mapa toktsüba sülen Mongulbarnü pa melena Óscar Arias shimogo, ta Sevilla Tir Jose Castro-i osangbenertem den senden amenba mapang ashi. Arias iba mapa küm ana abentsü sign süogo.

Yimlibilema, ne temesen anepaluang
LIVSAV[®] DS
 Syrup/Capsule

BILEMDANGANG
 "Nü dak aliba tesangwaji tangar nem teremsepdaksü."